

Yisasife Kanale Ke Maki Kaemalenea Ke

Ti falene'amatea Yoni'a mono ke huhaleno humane.

¹ Yisasi Kalaisi'a Anumaya Kotina ne'amofena kanale kea mage huno aepa hie.

² Anumaya Koti aune kanoa Aisaiya'a mage huno kaemaleneane
Anumaya Koti'a mage huno hie “Haviho ke hamapaisia kano'nia Yisasi aulega hagote'na hutesugeno kana valino hilato hugahie.

³ Ka'me kotegati nago kanomo'a keha keha huno mage hugahie “Anumayamo esia kana ali hilato hutama fatago hiho.” huno humaneane.

⁴ Yoni'a ti falene'amatea kanoa eva'yi huno ka'me kotega maineno mage huno hie “Tamakaya tamaku'a aiyahae hutama kefo yatamia ‘Nago'ene ohugahune.’ hutama ataletesage'na tina falelamatesugeno Anumaya Koti'a kefo yatamia aigetamateno atalelamategahie.” huno humane.

⁵ Ani yupa Yelusalemu vea'ene Yutia kotega vea'ene Yoni mainelega umaine'ya kefo ya'amihena hufalote hageno Yoni'a Yotani lipi tina falematene.

⁶ Yoni¹a kemolu afumo ayolagefaleti kena¹a faka¹nino failineno amu¹nofila pulamakamo au-gafaleti ayetalako huno kilineno kave¹a kenu¹ene tumemo tima¹aene neneane.

⁷ Mage huno hamapaiye “Nakavela nago kanoa ago egahie. Ani kanoa tusi¹a tokiya yama¹a hanea kanogino nagaila ago nagaseno maige¹na nagaya afa kano mainoanagi¹na agai aiyale ayesuana onategahie.

⁸ Nagaya titeti falenelamotoanagino ani kanomo¹a Anumaya Kotina Alu Aotage Avamu¹aleti falelamategahie.” huno hie.

Yoni¹a Yisasina ti faletene.

⁹ Ani kanafina Yisasi¹a Kalili kotega hanea kumala Nasaleti kumateti egeno Yoni¹a Yisasina Yotani lipi tina faletene.

¹⁰ Tina falene¹ategeno Yisasi¹a tipinagati aivati huno aupa¹a ageana ikamo¹a aihagalo higeno Anumaya Koti Alu Aotage Avamu¹mo¹a nama kana huno agaitega elavimaine.

¹¹ Elavigeno ikapinagati nagola agea aino mage huno hie “Kagaya nagai¹ni nafa¹nemoga kagaifena aluya huno nahau nayamopafi nenagea ne¹nimoga kagaifena aluya hu¹na museka¹a nehue.” huno hie.

Satani¹a Yisasina ayevataga humaine.

¹² Anumaya Kotina Alu Aotage Avamu¹amo¹a Yisasina vea¹ne omai ka¹me kotega anatino umaine.

¹³ Umainegeno Satani¹a* Yisasife “Havi kava huo.” huno ayevataga higeno foti¹a (40) yupa

Yisasi'a ani kotega afela afuyagaene mainege'ya ensole anaga'mo'ya meya hu'ya kava hutenaē.

Yisasi'a aepa heno ali'yama'a alimaine.

¹⁴ Yonina nofi hutenaeno Yisasi'a Kalili kotega Anumaya Koti kanale kea mo hamapaiye.

¹⁵ Yisasi'a mage huno hie “Anumayamo malenea kanamo'a ago eva'yi humainegi Anumaya Koti yagailamatesia kanamo'a aupala eva'yi hisia yafe tamakaya tamaku'a aiyahae hutama kefo yatamia ataletetama nagaijena kanale kea humainea kemo'a “Tamage humaine.” hutama tamakupi maletama tamametitia hiho.” huno humaine.

Yisasi'a fo'a (4) vaya ke hige'ya agai akave umainaē.

¹⁶ Yisasi'a Kalili ti kotumo agegayalega ne'uno Saimonina agana'amo'ene Etalu'ene anakeana noyame ku'ya neha'a kanolana maine'ana ala kukonogo ti kotupi haga'yu hu'ana nemala'e.

¹⁷ Yisasi'a mage huno hanapaiye “Nakave e'o. Nakave esa'age'na noyame ku'yama ha'a kava hu'na vaya ku'ya hulanategahue.” huno hie.

¹⁸ Hige'ana aupala kukonog'ania ne'atale'ana Yisasi akave umaina'e.

¹⁹ Va'ageno Yisasi'a nago'ene ne'uno Sepetina netalama'amogania Yemesi'ene Yoni'ene tipi kalefi maine'ana kukonogo nefaka'ni'ageno Yisasi'a monake.

²⁰ Anaketeno Yisasi'a ke hige'ana Sepetia ne'anafa'ene ali'ya vaya'aene tipi kalefite ne'amatale'ana Yisasina akave va'e.

Nago kanomo agu'afiti Yisasi'a Kefo Avamula anatitalene.

²¹ Kapaneamu kumate tavite'ya Yisasi'a Sapati yupa mono nopi haino Anumaya Koti ke humavelie.

²² Humaveligeno'a agai kemo'a to'kiya yama'a hanea kanomo ke kana hia yafena tusi'a amama'yo aige'ya mage hae “Nago'a kahegi kema havilinaya anaga'mo'ya nehaya avamete ke nehie.” hu'ya hae.

²³ Anile nago kanoa Kefo Avamu'mo'a agu'afi falemainea kanoa mono nopi emaine.

²⁴ Emaineno ala kenake huno mage hie “Avo Yisasigae Nasaleti kumate nafa'nemoga na'a hulategane? Tagaila tahaeka falilategahe emainano? Nagaya kagaifena ago havimainoe kagaya alu aotage kanoa Anumaya Koti hugatenea kano mainane.” huno hie.

²⁵ Higeno Yisasi'a Kefo Avamufena tokiya'age ke huno mage hie “Kea ohuka maiyo. Mani kanoa ataleka agusafinagati vuo.” huno hutene.

²⁶ Higeno ani Kefo Avamu'mo'a moyege meyege huteteno kasageke hia kava huteteno alakenake huno agusafiti ataleno hatilavimaine.

²⁷ Vige'ya muki'a vayala amama'yo aige'ya huge havige hu'ya mage hae “Na kava nehie? Na augafa haekafa ke nehie? Tusi'a to'kiyaleti anumaya'age ke hige'ya Kefo Avamu'mo'ya agai kea ali hipo'ya hu'ya hatilavi'ya vae.” hu'ya hae.

²⁸ Hageno Yisasi'ma humainea avagemo'a muki'a Kalili kotega ute ete hige'ya muki'a vea'mo'ya havimainae.

Yisasi'a Pitana a'amona ita'amo alekanoa kali'a alino kanale hutene.

²⁹ Yisasi'a Yemesi'ene Yoni'ene mono nona atale'ya anileti Saimonigani Etalugani nopinaga umainae.

³⁰ Umainageno Saimonina a'amona ita'amo alekanoa amukonako kali ne'aligeno Yisasi'a uva'yi hige'ya aupa'a ani alekanohe Yisasina hapaimainae.

³¹ Hapaigeno Yisasi'a agaite eno ayate alino hetitegeno amukonako kali'amo'a agola kanale hutegenog kavela kaeno amamine.

Yisasi'a muki'a kali veala alino kanale humatene.

³² Unena yagea tavifalegahe hige'ya vea'mo'ya kasago'ya kali vea'nea Kefo Avamu'mo'ya amaku'afima ali haviya nehia vea'nea Yisasite amavale'ya emainae.

³³ Muki'a ani kumate veala fiate elitalu humainae.

³⁴ Yisasi'a havigu havagu kali ne'aliya vea'nene ali hilato humateno muki'a Kefo Avamu'mola amaku'afiti amanatitalege'ya Kefo Avamu'mo'ya Yisasina ago'ma agemainaya yafe Yisasi'a mage huno hamapaiye “Mani yafena kea ohiho.” huno hamapaiye.

Yisasi'a Kalili kotega ali'ya alino vaiyemaine.

³⁵ Natena tani kotigeno Yisasi'a hetino ani nona ataleno vayo omai kotega umaineno nunamuna humaine.

³⁶⁻³⁷ Umainege'ya Saimoni'ene nago'a anaga'amo'yaene agaife aiyaka mae'ya agaitega

u'ya mage hu'ya mo hae “Muki'a vea'mo'ya kagaifena katine'ayae.” hu'ya hapaiye.

³⁸ Hapaigeno Yisasi'a mage huno hamapaiye. “Alu kumate kumate vigetao nagaya mono kea mo hamapaigahue. Mono kema hamapaisua yafe nagaya emainoe.” huno hamapaiye.

³⁹ Muki'a Kalili kotega via'yamo mono nopi Anumaya Koti kea hamapaino Kefo Avamula vea'mogami amaku'afiti amanatitalene.

Yisasi'a fugita kano alino kanale hutene.

⁴⁰ Nagola fugitayamo augafa alino ha'yagino atalako humainea kanomo'a Yisasite mepe huno mage huno hapaiye “Kahaisigekasina nagaila ago ali hilato hunatate'asine.” huno humaine.

⁴¹⁻⁴² Higeno Yisasi'a kalagi aiteteno ayana ha'yo huno augafale avate nehuno mage huno hie “Nahaige'na kaugafamo'a menia kanale hino hu'na nehue.” huno higeno anile aupa'a kali'amo'a ha'no hutene.

⁴³⁻⁴⁴ Ha'no hutetegeni Yisasi'a mage huno hapaiye “Aupa'a visana'amoga ali hilato hugatoa yafena nago kanoa ha'opaika mono nopi kava kanomote uka muki'a veala kalika'ama ali'na kanale hugatoa kema havinu'yahena mono nopi kava kanomo'a kaugafa kamota huno kagete-sigeka kaugafama ali kanale hugatoa yafena Moses'e'a ‘Ma yama Anumaya Kotina amio.’ huno humainea yana Anumaya Kotina momio.” huno to'kiya'age ke hapaiye.

⁴⁵ Hapaiyanagi ani kanomo'a via'amo kanale'ma hutea avagea alu kumate kumate

hamapaige¹ya kasago¹ya vea¹ne havite¹ya “Kalitia alino kanale hulatesie.” hu¹ya Yisasite emainae. Aya yafe Yisasi¹a fufu¹yate visia kana omalegeno amataleno vaya omai kotega umainege¹ya alu kumateti kumateti veala Yisasite emainae.

2

Yisasi¹a aiya aya falimainea kano alino kanale hutene.

¹ Yisasi¹a aupa kana kano¹a maiteno Kapaneamu kumate eteno noma¹afi “Emaine.” haya kea vea¹mo¹ya havimainae.

² Havite¹ya vea¹mo¹ya melitalu hageno noma¹afi¹ene nosi¹mekaenena hiya hige¹ya nago¹a veala fiategaenena maisaya yana omalegeno Yisasi¹a Anumaya Koti kanale mono kea hamapaiye.

³ Hamanepaige¹ya fo¹a (4) vaya¹mo¹ya nago kanoa aiya aya falimainea kanoa hagifanale avale¹ya faetete¹ya Yisasite avale¹ya ae.

⁴ Ayana kasago¹ya vea hiya haya yafe kana omalege¹ya nogatofulega haite¹ya Yisasi maineama¹aleti hanae yosa alisaga humalene¹ya ani hagifanale kali kanoa atalageno Yisasina avate elavimaine.

⁵ Elavigeno Yisasi¹a “Ma vaya¹mo¹ya nagaife havi¹ya amakupi male¹ya amametiti hae.” agha haviteno kali kanohe mage hie “Nafa¹ne¹nimoga nagaya kahanepauve ago aigekate¹na kefo yaka¹a atalegatoe.” huno hapaiye.

6-7 Hige¹ya kahegi kema havilinaya anaga¹mo¹ya anile mopale emaine¹ya amakai¹ami amaku¹afiti mage hae “Na¹a higeno mani kea nehie? Ma kanomo¹a Anumaya Kotifena huhaviya hune¹ate. Nago¹a vaya¹mo¹ya aigetate¹ya kefo yatia ataleotategahayanagi Anumaya Koti¹a agai¹age aigetateno kefo yatia atalelatesia kanoa maine.” hu¹ya hae.

8 Hageno Yisasi¹a aupa¹a amaku¹afinaga haviya kea agupi ago haviteno mage huno hie “Na¹a higetama mani kea tamaku tamakesafinaga nehaviye?

9 Nagayama hu¹na hisua kea hana kemo kana¹agela humane? ‘Aigekate¹na kefo yaka¹a atalenegatoe.’ hu¹na hisua kemo¹o? Ifi kali kanomofe ‘Hetika hagifanaka¹a alisaga hulika vuo.’ hu¹na hisua kemo¹o?

10-11 Nagaya ikapinagati emainoa kanoa vaya¹mo natenea kanomo¹na ma mopale maine¹na kefo yafe aigetamate¹na kefo yatamia atalelamatesua tokiya¹nia hanea yafema havisaya yafe nago kavala hu¹na tamaveligahue.” nehuno kalima alia kanohena mage huno hie “Hetika hagifanaka¹a ne¹alika nokalega vuo.” huno hapaiye.

12 Higeno ani kali kanomo¹a aupa¹a muki¹a vea amaulagafi hetino hagifana¹a ne¹alino hatilavimaine. Hetino via yafe muki¹a melitalu hu¹ya mainaya vea¹mo¹ya tusi¹a amama¹yo aige¹ya Anumaya Koti agia alisaga nehu¹ya mage hu¹ya hae “Menia ma yupa no¹agona tokiya¹age yana

ne'agone.” hu'ya hae.

Yisasi'a Livaife ke humaine.

¹³ Yisasi'a amataleno Kalili tikotumo agegay-alega ne'vige'ya muki'a vea'mo'ya agaitega molitalu hageno Yisasi'a humavelie.

¹⁴ Vilegati nago kanoa mogeana ani kanomo agia Livai'e Alafiusi nafa'nea mogeanagi Livai'a musufa ya huno vava amaugafaleti takisi mone aliliteno nehia kanogino opisi noma'ale mopale mainegeno Yisasi'a ani kanoa mogeteno mage huno hapaiye “Kagaya nakave eno.” huno higeno Livai'a hetino Yisasina akave umaine.

¹⁵ Haenaga Yisasi'a Livaina noma'afi kave mo nenege'ya muki'a musufaya hu'ya amaugafaleti takisi mone ne'aliya vava'ene nago'a kefo yama nehaya vava'ene Yisasi'ene tokae'ya nemaiya anaga'mo'yaene ani nopina tokae'ya maine'ya kavela nena. Ani yupa kasago'ya vava'mo'ya Yisasi'ke havite'ya akave umainae.

¹⁶ Yisasi'a ani kefo yama nehaya vava'ene vava amaugafaleti takisi miya ne'aliya vava'ene kave nenege'ya nago'a kahegi kema havilinaya Falasia vava'mo'ya mogete'ya Yisasi'ene tokae'ya nemaiya anagafe mage hu'ya hae “Na'a higeno Yisasi'a amaugafaleti takisi monema ne'aliya vava'ene kefo yama nehaya vava'enena kavela nene?” hu'ya hamavigae.

¹⁷ Hamavigageno Yisasi'a ani kea ago haviteno kenona'amia mage huno hamapaiye “Afa'a kalima no'aliya vea'mo'ya tota kanalega o'ugahagi kali veake tota kanalega ughae.

‘Fatago vea mainone.’ hu'ya nehaya veafe ke hugahe nagaya omenogi kefo yama nehaya veafe ke hugahe emainoe.” huno hie.

Yisasi'a kave'ma monesiya yafe humaine.

¹⁸ Nago yupa Yoni'ene tokae'ya nemaiya anaga'mo'yaene Falasia vaya'mo'yaene* kave monesiya yafe nago'a vayala Yisasite e'ya mage hu'ya havigae “Na'a hige'ya Yoni'ene tokae'ya nemaiya anaga'ene Falasia vaya'ene kavela mosi'ya nemaiyanagi kagai'ene tokae'ya nemaiya anaga'mo'ya kavela nege nege hu'ya nemaiye?” hu'ya hae.

¹⁹ Hageno Yisasi'a mage huno hie “Nago kanomo a'ma fai'ya esageno avaya heno nesia imu kisia yupa vaya'amo'yaene to'kae'yama maisayana ani vaya'mo'ya kavela mosisao? A'ao ani kanoa maineanagi'ya mo'osigahae.

²⁰ Mo'osigahagi haenaga alu kana falote hisige'ya kame vayamo'ya a'ma alisia kanoa atafa hu'ya amakaipiti avalesage'ya ani kanafina mainesaya vaya'amo'ya hamau hutete'ya mosigahae.

²¹ Nago kanomo'a haegafa kena alino atafa kenalela maleno ohatigahie. Maleno hatisiana haegafa kenamo'a taga huno ali haviya hugahie.

²² Nago kanomo'a haegafa nofi alagamo tima'a takino atafa mememo augafa ti ke'ayopina otakigahie. Takisiana ani limo'a ka'nuka hesigeno ti kena falo huno takilavinageno ani li'ene ke'ayo'ene ali haviya hugahie. Haegafa nofi

alagamo tima'la hefino haegafa meme augafamo ti ke'ayopi takino vaino.” huno humaine.

Yisasi'la Sapati yupa ali'yama no'aliya yafe humaine.

²³ Nago Sapati yupa Yisasi'ene agai'aenema tokae'ya nemaiya anaga'ene atili hoyafi ne'u'ya atilia kalemaina.

²⁴ Negalage'ya nago'la Falasia vaya'mo'ya agete'ya Yisasife mage hu'ya hae “Ago Sapati yupahena nagalu humalenaya kea ne'atagayae.” hu'ya hae.

²⁵ Hageno Yisasi'la mage huno hie “Tamakaya Teviti'la agai'ma avagi hu'ya vaya vaya'ene amakatege'ya humainaya yafena nayoma kaemalenaya kea hapalitama ohavinayanagitama nehao?

²⁶ Amakategeno Anumaya Koti nopi haino afa vaya'mo'ya onegahae mono note kava vay-ala* amakai'amige negahae.' hu'ya nagalu humalenaya kavela Anumaya Koti aulagale male-naya kaihame maya Teviti'la neneno tokae'ya umainaya vaya'aene amamige'ya nemaina.” huno humaine. Ani kanafina Apiata'la ala mono note uhagote mainea kava kano mainea kanafine.

²⁷ Yisasi'la Falasia vayafe mage huno hamapaiye “Vaya'mo'ya maifalu hisaya kana Anumaya Koti'la Sapati kana talo humalenegi vea'mo'ya ani kanamona atafa hisaya yafe veala talo ohune.

28 Ikapinagati emainoa kanoa vaya'mo nate-
nea nafa'nemo'na Sapati kanamona kava ya-
gaimainoe.” huno hie.

3

*Sapati yupa Yisasi'a aya falimainea kanoa
alino kanale hutene.*

¹ Yisasi'a nago yupa mono nopi haino mai-
negeno nago kanoa ayamo falimainea kanoa
anile maine.

² Mainege'ya nago'a vaya'mo'ya Yisasi'ma
havi kava'ma hisiafene hu'ya amata hu'ya
mainageno “Yisasi'a Sapati yupa ani kali kanoa
alino kanale hutesio.” hu'ya Yisasina amata
hu'ya mainae.

³ Amata hu'ya mainageno Yisasi'a ayama fal-
imainea kanomofe mage huno hapaiye “Hetika
vaya amu'nopi me hetio.” huno hapaiye.

⁴ Hapaiteno Yisasi'a amata hu'ya maiya
vayafena mage huno hie “Tamahavigoe Sapati
yupama hisaya yafena mono kemo'a na'ane
humaine? Sapati yupa vayala ali'ya kanale
humategahao ifi ali haviya humategahae? Sapati
yupa veala amavale'ya avina me matesao ifi
veala tavata hamaegahae?” huno hamavigege'ya
kea ohu'ya mainae.

⁵ Kea ohu'ya maigeno Yisasi'a muki'a vaya
amaulagafi moge mege hiana muki'amogami
amaku'mo'a atalako hia yafe aipamo'a kana
higeno kali kanomofe mage huno hapaiye
“Kayana aipi huo.” huno higeno aipi hiana
ayamo'a kanale hutene.

⁶ Kanale'ma hutea yafena Falasia vaya'mo'ya mono nona ne'atale'ya Heloti vaya'ene alitalu hu'ya huge havige hute'ya “Yisasina hana'a huta haesunageno falisie.” hu'ya vege humainae.

Yisasite kasago'ya veala ti agegayale melitalu humainae.

⁷⁻⁸ Yisasi'ene agai'aenema tokae'ya nemaiya anaga'aene Kalili ti kotumo agegaya ne'vage'ya kasago'ya vea'ne Kaliliti akave vae. Yutiati'ene Yelusalemuti'ene Itumeati'ene Yotani tifaligati vea'nene Taiyati'ene Saitoniti'ene muki'a veala Yisasi'ma hia avage'a havite'ya agaitega vae.

⁹ Ne'vageno agai'aenema tokae'ya nemaiya anagafe mage huno hamapaiye “Muki'a alitalu haya vea'mo'ya nagaila ayenatunefayafe tipi kalea talo tala hunateho.” huno hie.

¹⁰ Kasago'ya veala kali'amia alino kanale humatea yafe muki'a kali vea'mo'ya Yisasi augafale avate hugahe ayetufeli'ya vae.

¹¹ Ne'vage'ya Kefo Avamu'mo'ya vea amakusafi maine'ya agete'ya Yisasina aulegati mopafi amako'ya meye'ya ala kenake hu'ya mage hae “Kagaya Anumaya Kotina nafa'ne'amoga mainane.” hu'ya hae.

¹² Hageno Yisasi'a tokiya'age ke huno mage hie “Ani kea nago'a veala hamaopaiho.” huno hamapaiye.

Yisasi'a agai'a tuelufu'a (12) anaga'a hapalimatene.

¹³ Yisasi'a ago'yafi haiteno haiya vayafe ke hige'ya emainae.

14-15 Ageno ani vayapiti tuelufu'a (12) vaya hapalimateteno agai'aenema tokae'ya maisaya yafe'ene agai kema huhale'ya hisaya yafe'ene hapalimatene. Hapaliteni tokiya'a ne'amamino Kefo Avamula vea'mogami amakusafiti amanati-alesaya yafe'ene hapalimatene. Mage huno hamapaiye “Nagai kema havige'na hulamatoa vayala (Aposolo vaya)* maiho.” huno hapalimatene.

16 Ani tuelufu'a (12) anaga'mogami amakia Saimoni'e kanomo agia Yisasi'a Pita'e huno malene.

17 Yemesi'ene agana'amo'a Yoni'ene Sepetina ne'amogania Yisasi'a anakia Poanesi'e huno malene. Ani anakimo'a tagai kefina monagemo'ma hia avamete hu'ana tokiya'age ke neha'a kanolatanene huno anakia malene.

18 Etalu'e Filipi'e Patolomiu'e Matiu'e Tomasi'ene Yemesi'a Alafiusi nafa'nene Tatiusi'ene Saimonina hamo'amo'a nago agia Seloti'e.

19 Yutasi Isakalioti'a Yisasina haenaga'a agesi huno kame vaya amayapi avaleno atesia kanoe.

“Yisasi'a Pielesepulimo tokiyaleti ali'iana ne'alie.” hu'ya humainae.

20 Yisasi'a noma'alega umainege'ya muki'a veala Yisasite elitalu hageno Yisasi'aene tokae'ya nemaiya anaga'ene kave negahe haya yapi veala mehiya hage'ya onenae.

21 Agai'a konaga afamo'amo'ya havite'ya Yisasife “Aifonafonahie.” hu'ya Yisasina avalegahe emainae.

22 Yelusalemu kumateti kahegi kema havilina naya anaga'mo'ya Yisasife mage hu'ya mehae “Kefo Avamu'ma kava humainea kanoa Pielesepulimo'a agupi maineno tokiya amigeno Kefo Avamula anatine'atale.” hu'ya humainae.

23 Hageno Yisasi'a haviteno “Nagaite eho.” huno ke hige'ya ageno avame kefiti mage huno hamapaiye “Satani'a hana'a huno Satanina anatalegahie?”

24 Nagoke kotega vea'mo'ya ali fako hu'ya “Alu vea mainone.” hu'ya tuma hisayana ani kotega vea'nenena ha'no hugahae.

25 Nagoke afamo'mo'ya ali fako hu'ya “Alu anaga mainone.” hu'ya tuma hisayana ani afamola ha'no hugahae.

26 Ha'no hugahagi Satani anaga'mo'ya ali fako hu'ya “Alu vaya mainone.” hu'ya hisayana Satani kava yagaisia tokiya'a omalegahianagino haviya huno ha'no hugahie.

27 Nagola tokiya kanomo'a noma'afima yagaino mainesigeno'a nago kanomo'a musufa yama hugahe vinuno'a hagoteno ani tokiya kanomona nofiteti kitalako huteteno afeno'yama'a musufa yana hugahie.

28-29 Na'a humaineafe nagaya tamage hu'na tamahanepauve vea'mo'ya muki'a alu kefo yama alu kefo ya'ene huhaviya humate ya'ene hisayana Anumaya Koti'a aigetamateno kefo yana atalelamategahianagi nago'a vea'mo Alu Aotage Avamufema huhaviya hutesayana Anumaya Koti'a aigeo'amategahianagi ani kefo

yama'a hanege hanege huno hanegahie.” huno humaine.

³⁰ Hige'ya “Kefo Avamu'mo'a Yisasi'na agupi maine.” hu'ya haya kehe Yisasi'a ani kea huno hamapaiye.

Ta'ya Yisasina ita'amo'yaene agana'amo'yaenena mainae.

³¹ Yisasina ita'amo'ene agana'amo'yaene e'ya kumatega me heti'ya maine'ya nago kanoa hutageno Yisasife ke hie.

³² Ke hige'ya muki'a veala elitalu hu'ya Yisasina aiyafi mopale maine'ya agaife mage hu'ya hae “Itakamo'ene kaganakamo'yaene kumatega emaine'ya kagaife ke nehae.” hu'ya hapaiye.

³³ Hapaigeno Yisasi'a mage huno hie “Ita'nimo'ene nagana'nimo'ya ta'ya mainae?” huno hamavige.

³⁴ Hamavigeno agai'enema mopale mainaya veala momake memake huno amaketeno mage huno hie “Ita'nimo'yaene nagana'nimo'yaenena ma ma nagai'ene mopale mainae.

³⁵ Anumaya Koti kema havite'ya haiya kava'ma nehaya veala ita'nimo'ya nagana'nimo'ya nasa'nimo'ya mainae.” huno hie.

4

Nago kanomo'a hoyafima avina nefaiya yate Yisasi'a avame kea humaine.

¹ Yisasi'a tikotumo agegayalega umaineno nago'ene humavelige'ya kasago'ya vea'nea

agaite elitalu hu'ya yage'yage haya yafe tipi kalefi haisaga humaino mopale maiteno ti amu'nopi umainege'ya yage'yage haya vea'mo'ya ti agegayalega heti'ya mainae.

²⁻³ Heti'ya mainageno Yisasi'a alu ke alu kea avame kefiti mage huno hamapaiye “Haviho nago kanomo'a avina hanaigahe vie.

⁴ Avina yama'a alino aihelafino nehanaigeno nago'a avinamo'a kapi tavino hanege'ya namayagamo'ya me ne'ya ha'no hae.

⁵ Nago'a avinamo'ya yafa mopafi tavite'ya osi'a mopa hanea yafe aupa'a hagemainae.

⁶ Hagayanagi yagemo'a teno amukonako higeno hafu'ya omalea yafe fayote'ya asagaliye.

⁷ Nago'a avinamo'a avetanafa inomo amu'nopi tavino hageteno avetanafa ino'ene tokae'ana haitete'ana avetanafa inomo'a ayetegenon haviya higeno alaga'a falote ohune.

⁸ Falote ohunegi nago'a avinamo'a kanale mopafi tavino hageteno ala huno alaga ayeana nago'a avinamo'a teti'a (30) alaga ayegenon nago'a avinamo'a sikisiti'a (60) alaga ayegenon nago'a yosalela kasago'ya vani hataleti'a (100) alaga ayeno vasaimai vasaimai humaine.

⁹ Tamakesama hanesigetama havilama hutama haviho.” huno hie.

Yisasi'a na'ane aghesa hanegenon avame kege'yana humaine.

¹⁰ Muki'a veala utage'ya agai'a tuelufu'a (12) anaga'amo'yaene nago'a vea'ene ani avame kemona aepa'ahe havigae.

¹¹ Havigageno Yisasi'a mage huno hamapaiye “Tamakaila Anumaya Koti'a kava yagailamate-nea yafe falakimainea kea Anumaya Koti'a tamaya hinagetama havigahagi nagai kema no-haviya veala avame keke'ya hamanepauve.

¹² Ani vea'mo'ya ageme geme nehaiyanagi age-lama hu'ya o'agegahae. Havime havime nehaiyanagi havilama hu'ya ohavigahae. Havilama ohisaya yafe avame kea hamanepauve. Havigu havilama hu'ya amaku'a aiyahae hisageno Anumaya Koti'a aige'amateno kefo ya'ami atale-mateyafe nehue.” huno hie

Avinamote avame kea huhaleno hie.

¹³ Yisasi'a mage huno hie “Mani avame kea havilama ohunao? Muki'a avame kea hana'a hutama havigahae?” huno hie.

¹⁴ Avina yama hanaigahe via kanomo'a Yisasife kanale mono kea nefaiye.

¹⁵ Nago'a vea'mo'ya kapi tavimainea avinamo avamete mainageno kanale kea faimalegeya maine'ya Anumaya Koti kea haviyanagi amakupi omalesaya yafe Satani'a amakupitila ani kea melitalene.

¹⁶ Ani'a huno yafa mopafima tavimainea avinamo'a ma'a humaine nago'a vea'mo'ya Anumaya Koti kea havi'ya aup'a'atafa hute'ya muse hae.

¹⁷ Muse hayanagi hafu'yamo'a mopafi otavinea yamo'a alige atalege vea'ne maine'ya osi kana kano'a osi'a havi'ya amakupi maletageno havi kanama falote nehiano Anumayamo kema haviya yafe vea'mo'ya ali

haviya humatesaya kanamo'ma amakaite falote nehiano aupa'a Anumaya Koti kea ne'atalae.

¹⁸⁻¹⁹ Nago'a avina avetanafa hanea inomo agusafi tavimainea avinamo'a ma'a humaine nago'a vea'mo'ya Anumaya Koti kea havite'ya ma mopafi muki'a ya'yaga'amihena amakesa havi'ya mone'amima yokalo'amihena kalagi aige'ya ani ya'yagamo'a Anumaya Koti kea ali'ya ayetalako hute'ya atalageno alaga aye helafino tama nohie.

²⁰ Tama nohianagi kanale mopafima tavimainea avinamo'a ma'a humaine nago'a vea'mo'ya Anumaya Koti kea havi'ya amakupi malageno ani alaga muki'a aye henelafie. Nago'a vea'mo'ya nagoke avina yosalela teti'a (30) alaga ayemainae. Nago'a vea'mo'ya nagoke avina yosalela sikisiti'a (60) alaga ayemainae. Nago'a avina yosalela vani hataleti'a (100) alaga ayemainae." huno humaine.

Vea'mo'ya lamua hanagali'ya sipale kapinaga nomalae huno humaine.

²¹ Hamapaiya yafe Yisasi'a mage huno hamavige "Nago'a vea'mo'ya lamua hanagali'ya susu-faneletila aiso hunemalao ifi sipa kapinaga hanagali'ya aiso hunemalae? A'ao aihalesia yafe sipale hanagali'ya nemalae.

²² Haenaga'a muki'a falakimainesia yamo'a efalote hugahie. Muki'a kesi kava nehisaya yamo'a efalote hinage'ya vea'mo'ya agegahae.

²³ Tamakesama hanesimogatama havilama hutama haviho." huno hie.

24 Huteno mage huno hie “Anumaya Koti kema havisaya yafena tamakesa havilama hutama haviho. Havisaya kea akave malesageno nago'a kene tamahapaisigetama havigahae.

25 Havilama huno havilinesia kanomona Anumaya Koti'a nago'ene havisia yana amigahianagi ‘Ago havilinoe.’ huno nehisia kanomona havilinesiam'a hafalegahie.” huno hie.

Avina yamo'ma nehagea yate avame kea humane.

26-27 Yisasi'a mage huno hie “Anumaya Koti kava yagaimainea yamo'a ma'a humane. Nago kanomo'a avina yana hoyafi hanaemaleteno kegela mo faeteno feluga hetiteno huge hugeteana ani avinamo'a hana'a huno falote huno ala nehia yamona aepa'a ani kanomo'a o'agene.

28 O'agenegi afa'a mopamo'a agai'age'ya nuna amigeno aifalo huno hageteno haisa falote huteno haenaga alaga ayeno afu nele.

29 Akavi huteno afuma nelea kanamo'a ago eva'yi hia yafe aupa'a via'yamo naepeleti hataga humane.

Masatati avina yosamote avame kea humane.

30 Yisasi'a mage huno hie “Anumaya Koti'a kava yagaimainea yamo'a hana'a humane? Na'ane hu'na ma'a huno hane hu'na avame kefitila tamahapaisue?

31 Ma ma osi alagamo hia avamete humane. Ani alagamo agia masatatie. Ani osi osi

alagamo'a nago'a yosalagama negaliya yosalagamo'a agaseno osi kano'a hane.

³² Osi osi humaineanagi kalimaletegenohageno haiteno ala yosagefa haino muki'a hoyafima hanea yosayaga amakaseno aya'aya humainege'ya namayagamo'ya akopatela no'amia me negiye." huno hie.

Yisasi'a avame kege'ya humane.

³³ Yisasi'a ani'a huno kasago'ya avame kea alumo alumo huno amakupima havisaya avamete kea hamapaiye.

³⁴ Yisasi'a vaya'yagaene maineno muki'a kema hamapaiya kea avame kege'ya hamahapaiyanagi agai'aenema tokae'ya nemaiya anagala ama-haute mainageno hufalote huno hamapaimaine.

Yisasi'a ala yasimofe higeno taga humane.

³⁵ Ani yupa yagemo'a tavifalegahe higeno Yisasi'a agai'aenema tokae'ya nemaiya anagafe mage huno hie "Tikotumona atu faliga vegetao." huno hamapaiye.

³⁶ Hige'ya muki'a elitalu humainaya veala ne'amatale'ya tipi kalefi haisaga humai'ya Yisasi'ina avale'ya vageno nago'a tipi kaleyagamo'ya agai tipi kalene tokae'ya vae.

³⁷ Ne'vageno tusi'a yasimo'a alino timona aikalato kalato huno tipi kalefi atalegeno tipi kalefi havategahe hie.

³⁸ Havategahe higeno Yisasi'a tipi kalemona akavelega tala yosale afita aino faemainege'ya agafa hu'ya mage hae "Hulavenelina kanomogae

tikotupi asaga hulavita ti nakaita falisunageka kahauna huotategano?” hu'ya hae.

³⁹ Hageno Yisasi'a hetino ani limofe'ene yasi-mofe'enena tokiya'age ke huno “Taga huo.” higeno yasimo'ene timo'enena taga hu'ana alava humaina'e.

⁴⁰ Alava higeno Yisasi'a agai'aenema tokae'ya nemaiya anagafe mage huno hie “Na'a hige-tama kolia nehae? Nagai'e havitama tamakupi maletama tamametiti nehaya yamo'a kale'yo humaineo?” huno hamavige.

⁴¹ Hamavigege'ya amama'yo aite'ya huge havige hu'ya mage hae “Ma kanoa ta'e? Yasimo'ene timo'ene agai kea havite'ya akave nemalae.” hu'ya hae.

5

Yisasi'a aifo kanomo agusafiti Kefo Avamula anatitalene.

¹ Kalili ala tikotuna takae'ya ame agegayamona Kelasa* vea mainalega uva'yi hae.

² Yisasi'a ani tipi kalea ne'ataleno ti agegayalega ne'vigeno nago kanomona Kefo Avamu'mo agupi mainea kanomo'a matimatipinagati Yisasi'e emaine.

³ Ani kanoa yafakapinaga noma'a hanegeno anifinaga mainege'ya tokiya'age seni nofiteti kitesaya vayala omainae.

⁴ Vaya'mo'ya seni nofiteti aiya aya'ene kisalu kimalenageno ani nofila aigalu hene'ataleno aiyafi nofila yafateti ailatapegeno nofila aika'no

higeno “Ako huka maiyo” hu'ya hapaisaya tokiya'amima hanea vayala omainae.

⁵ Omaigeno ani kanomo'a nate'ene kege'ene efi efi huno matimatipinagaene ago'yale'ene maineno tusi aviteno avovo nehuno yafateti agai'a augafa aige talaga talagoma humainea yamo'a amumo'a tusiya humaine.

⁶ Ani kanomo'a Yisasina aya'ayate ne'legeno ageteno aiyayeno eno aiyafi ale'ya meyeno mopafi maineno alisoso hune'ate.

⁷⁻⁸ Yisasi'a mage huno hie “Kefo Avamu'mogae agusafinagatila hatilavio.” huno hutea yafe ani kanomo'a ala kegefafiti mage huno hie “Yisagi-gae, ago tagaseno anale mainea Anumaya Kotina ne'amogae, na'a hunategahe nehane? Museka'a nehugi nagata aisia kavala huonato.” huno hie.

⁹ Higeno Yisasi'a ani kanohena mage huno hie “Kagai kagia tagae?” huno havigegenon “Nagia Kasago'ya-mo'nae. Muki'a Kefo Avamu'mo'ya nagupi haifale'ya mainaya yafe nagia Kasago'yamo'nae.” huno hie.

¹⁰ Huteno Yisasifena mage huno hie “Museka'a nehue ma kumatetila Kefo Avamula humatesan-age'ya alulega o'visae.” huno hie.

¹¹ Nehige'ya kasago'ya afuyagamo'ya ago'yafi maine'ya kave nena.

¹² Nenage'ya Kefo Avamu'mo'ya Yisasife mage hu'ya havigae “Ani afuyagamo amaku'afi hulategeta vama.” hu'ya havigae.

¹³ Havigageno Yisasi'a “Ani'a hiho.” huno hige'ya Kefo Avamu'mo'ya ani kanomo agupitila

hatilavi¹ya afuyagamogami amakupi haifalageno ani afuyagamo¹ya amaiyaye¹ya nagola aulufi kapi tavite¹ya tipi asaga hulavi¹ya ti nakai¹ya fali ha¹'no humainae. Afua tu tauseni¹a (2,000) afuyaga fali ha¹'no humainae.

¹⁴ Fali ha¹'no hage¹ya ani afuyagale kava ne¹yagaiya vayala fale¹ya ala kumatega mainaya vea¹nehe¹ene hoyafinaga mainaya vea¹nehe¹ene “Na¹a ma¹a higeta ne¹one.” hu¹ya hamapaige¹ya ani veala “Hia yana agesune.” nehu¹ya emainae.

¹⁵ Yisasite e¹ya kasago¹ya Kefo Avamu¹mo¹ma agupifiti hatilavino via kanomona agesa akalo higeno kena¹a failino anile mopale mainege¹ya megete¹ya koli hae.

¹⁶ Yisasi¹ma humainea kava¹ma agemainaya vea¹mo¹ya na¹a ma¹a huno Kefo Avamula agupima mainea kanoa alino kanale hutea yafe¹ene afuyagama humatea yafe¹ene hamapaiye.

¹⁷ Hamapaige¹ya ani vea¹mo¹ya Yisasifena “Tagaila tataleka ago vuo.” hu¹ya hae.

¹⁸⁻¹⁹ Hageno Yisasi¹a ugahe tipi kalefi haisaga hunemaigeno Kefo Avamu¹ma agupiti ataleno umainea kanomo¹a Yisasifena “Kagai¹ene visu¹e.” huno havigegenno Yisasi¹a “A¹ao kagaya nokalega visana¹amoga muki¹a Anumayamo¹ma aigekateno hugatea yafena vayakamogamina mo hamapaiyo.” huno hie.

²⁰ Higeno ani kanomo¹a via¹yamo teni¹a (10) ala kuma¹yaga hanea kotega uno Yisasi¹ma hutea yafena hamapaige¹ya muki¹a vea¹mo¹ya

amama'yoa aimainae.

Soka kanomo munala faligahe humaine.

²¹ Yisasi'a tipi kalefi asaga humaino tina lakaeno eteno ti agegayalega ege'ya muki vea'mo'ya agaito melitalu humainae.

²² Emainageno nagola soka kanoa, Yailasi'e nehaya kanoa, emaineno Yisasina mogeteno aiyafi mope humaine.

²³ Mope humaineno tokiya'age huno Yisasina mage huno havige “Vae nagai munala faligahe ayaya ne'aigi kaya mo maletesanageno kanale hutesie.” huno hie.

²⁴ Higeno Yisasi'a agai'ene vige'ya veala yage'yage hu'ya akave umainae.

Yisasina kena'ale avate hia a'mona kali'amo'a ha'no humaine.

²⁵ Vageno tuelufu'a (12) kafua muki'a kanale aigu nopinaga nemaiya aala anile maine.

²⁶ Nago'a tota vayate ute ete hugeteana agataiya kavala hageno mone'ama amaminea yamo'a ha'no higeno ani kali'a nago kanomo'a ali kanale huo'atenegi kali'amo'a ala humaine.

²⁷ Ani a'mo'a Yisasi avagea haviteno ani yage'yage'ma haya veapi Yisasina akavelegati kena'ale mevate hie.

²⁸ Avate nehuno agesa mage huno havie “Kena'ale avate nehisugeno kali'nimo'a ha'no hunategahie.” huno agesafinaga havimaine.

²⁹ Haviteno ani'a higeno aupa'a kolamo'a ta'negenon augafafinaga malegenon ageana kali'amo'a ago kanale hutene.

³⁰ Kanale huteanagi Yisasi'a "Nago'a tokiya'nia ago nataleno vie." huno agesafinaga haviteno anifima alitalu humainaya vea'mogami amu'nopi maiyaha huno mage hie "Ta kena'nilela mevate hie?" huno humaine.

³¹ Hige'ya agai'aenema tokae'ya nemaiya anaga'amo'ya mage hae "Muki'a veala yage'yage hageka ne'aganagi na'a higeke na kea hamavinegane?" hu'ya hae.

³² Hageno Yisasi'a moge mege huno avate hia kanohe ati ayemaine.

³³ Ati ne'ayegeno ani a'mo'a kali'a ago kanale hutegeno agea yafe koli huno atili huteno aiyafi mope huno Yisasi'ma hutea yafena tamage huno hapaiye.

³⁴ Hapaigeno Yisasi'a mage huno hie "A'mogae nagaifema havika kagupi maleka kametiti hanageno ago kalika'amo'a kanale hugategi kaipamo'a yasi nehinageka afa'a vuo. Kalika'a agola ha'no hie." huno hapaiye.

³⁵ Hanepaige'ya nago'a vayala soka kanoa, Yailasi notegati mage hu'ya me hapaiye "Munakamo'a ago falimainegi ataleka kava kanomona kasalo haegi nago'ene havioko." hu'ya hae.

³⁶ Hageno Yisasi'a hapaiya kekena ohavisia agesa haviteno soka kanohe mage huno hie "Kolia ohuka nagaife havika kagupi maleka kametiti huo." huno humaine.

³⁷ Muki'a veafena omeho hune'amateno Pita'ene Yemesi'ene nepu'amo'a Yoni'ene amavaleno umainae.

38-39 Soka kanomo note uva¹yi hu¹ya agayana muki¹a veala tusi¹a avine¹atageno Yisasi¹a nopi haifaleno amakaifena mage huno hie “Na¹a hige¹tama tusi¹a aviane¹atae? Ma munala ofalinegi afa¹a faeno maine.” huno hie.

⁴⁰ Mani kea hige¹ya vea¹mo¹ya falige¹yama agaya yafe kigi¹a hutageno “Kumatega hatilavita¹tama viho.” huno hige¹ya kumatega hatilavigeno Yisasi¹a ita¹afo¹amoganiene agai¹aenema vaya anaga¹ene amavaleno falimainea muna¹ma malalega amavaleno haimaine.

⁴¹ Haino umaineno ayate atafa hulineno agai¹a kefiti mage huno hie “Talita kumi.” huno hie. Tagaiti kefina “Ma muna¹moga kahanepaugi hetio.” huno humaine.

⁴² Higeno aupa¹a ani muna¹mo¹a hetino ute ete hie. Ago ala munalagino tuelufu¹a (12) kafu¹a hanea munalagino hetino ute ete hige¹ya anile mainaya vea¹mo¹ya amama¹yo aiye.

⁴³ Amama¹yo aigeno Yisasi¹a tokiya¹age ke huno “Anima agaya yafena veala hama¹opaiho” huno kahegi ne¹amateno “Kavela amiho.” huno humaine.

6

Nasaleti kumate vea¹mo¹ya Yisasina amakave¹no hutena.

¹ Yisasi¹a ani kumala ataleno via¹amo ko aepa¹alega vige¹ya agai¹aenema tokae¹ya ne-maiya anaga¹mo¹ya akave umainae.

² Sapati yupa mono no¹amifi haino Anumaya Koti kea muki¹a vayala hamapaige¹ya havite¹ya

amama'yo aige'ya mage hu'ya hae “Muki'a havi havi'yana hanateti alia kea nehie? Ayapi-tila tokiya'age avame yama humainea tokiya'a hanateti alimaine?

³ Mani kanoa no negia ali'yate kano maineanagi Malia nafa'ne mainegi Yemesi'ene Yosese'ene Yutasi'ene Saimoni'enena agana'amo'ya mainagi asa'amo'ya tagai'ene nagopi mainae.” hu'ya hute'ya amaipa kafa hete'ya amakave'no hutenaē.

⁴ Amakave'no hutayanagi Yisasi'a mage huno hie “Anumaya Koti kema nehia kanomo'a muki'a kumate mono huhaleno hamapaisiana agia alisaga nehagi kuma'ale maisiana agai'a afamo'ene no kuma'ale vaya'enena agia alisaga ohugahae.” huno humaine.

⁵ Mani kumatela ala tokiya avame yana ohunegi afa'a nagoke nagoke kali vayake aya malegeno kanale humatene.

⁶ Kanale humatenegi afa'a muki'a veala agaife havi'ya amakupi male'ya amametiti ohaya yafe Yisasi'a ama'yo aigeno alu kumate kumatela vaiyeno monola hamapaino humaveli maine.

Yisasi'a tuelufu'a (12) anaga'amogamina ali'yate humatene.

⁷ Yisasi'a tuelufu'a (12) anaga'amogamife ke hige'ya ageno muki'a Kefo Avamu'ma vea'mogami amakupiti amanatitalesaya tokiya amamiteno mage hie “Tole ali lokaete lokaete hutama viho.” huno humatene.

8 Hune¹amateno mage huno hie “Kama visayana ayopatamige alilitama viho. Kutamiene mayaene monetamiene alitama o¹viho.

9 Tamaiya nona vaigahayanaki tole siota vaio¹aliho.”

10 Nago¹ene mage huno hie “Nago nopima haifalenuamahena ani nopi faetama maitama hutetama amataletama alu kumatela viho. Faelitetama ohiho.

11 Nago¹a kumate¹ma visage¹ya vea¹mo¹ya ali falu falama huotamate¹ya “Tamakai kema ohavigahune.’ hu¹ya hisagetama ani kumala ne¹ataletama ‘Havi kava hae.’ hutama hisaya yafe tamaiyafima hanesia kugukege mopa aihehe hune¹ataletama viho.” huno hamapaiye.

12 Hamapaige¹ya ani vayala ne¹u¹ya muki¹a vea¹nehe mage hu¹ya hae “Kefo yatamihena havitama tamakaye nehinagetama tamaku¹a aiyahae hiho.” hu¹ya hamapaiye.

13 Hamapai¹ya muki¹a Kefo Avamula vea¹mogami amakupitila amanati ne¹atale¹ya kasago¹ya kali veala amaugafale masavena falematageno kanale humatene.

Heloti¹a agesa haviana Yisasifena “Ti falemate Yoni¹e.” huno humaine.

14 Ani kanafina Yisasi avagemo¹a ala higeno nagola sauve kanomo agia Heloti¹e anima haya kea havimaine. Nago¹a vea¹mo¹ya Yisasifena mage hu¹ya hae “Ma kanoa tima falematea Yoni¹e falimainefiti hetimaine. Hetimaineafe tokiya¹a hanegenoma tokiya ali¹yana ne¹alie.” hu¹ya hae.

15 Hage'ya nago'a vea'mo'ya Yisasifena mage hu'ya hae “Ma kanoa Ilaiya maine.” hu'ya hage'ya nago'a vea'mo'ya “Aune kanoa nayo amaune vaya kana nehie.” hu'ya hae.

16 Hageno Heloti'a haviteno mage huno hie “Yonina haeho hu'na huge'ya age'ya hataga hutalenaya kanoa faliteno komufiti hetimaine.” huno hie.

17-18 Helotina agana'amo agia Filipi'e. Filipi a'mo agia Helotiasi'e. Heloti'a Helotiasina kumai a alitenea yafe Yoni'a Helotife mage huno hie “Anumaya Koti kea atagaeka kaganakamo aala kumai a alitenane.” huno hia yafe Heloti'a vayala humatege'ya Yonina motafa hu'ya avale'ya kina nopi hutenayane.

19-20 Hutenageno Helotiasi'a Yonifena tusi hai vaiteteno haesageno falisia agesa havino maiyanagi Heloti'a agesa mage huno havimaine “Yoni'a kefo yana ohuno fatago kanoa alu aotage kano maine.” huno havilinea yafe Yonifena koli huno “Ohaegahae.” huno au'ne'vaino agai kea haviteno agesa ku'mo nehuno tole agesa havino afa'a muse huno ke'a nehaviane.

21 Nago yupa Helotina atenea kanamo'a falote higeno Heloti'a ala imu kimaleteno muki'a kamani kava vaya'ene ati kava vaya'ene Kalili kotegama afenoma'a kasago humainea vaya'yagaene ke hige'ya imulega emainae.

22 Emainageno Helotiasina muna'amo'a eno amone'ayegeno Heloti'ene vaya'amo'yaene ne'age'ya tusi'a musema'a hageno Heloti'a ani

muna'mofena mage huno hie “Kahaisia yafena afa'a hisanage'na kamigahue.

²³ Anumaya Koti aulagafi kahanepauve nago'a yafema nahavigesanana afa'a kamigahue. Mone feno'enefema nehuka mopaenefema hisanana afa'a nagai ya'yaga haneanagi'na amu'nopiti ali fako hu'na kamigahue.” huno humaine.

²⁴ Higeno ani muna'mo'a via'amo ita'amofena mage huno havige “Na kanohe ke hu'na havigesue?” huno higeno ita'amo'a mage huno hie “Yoni'a ti falemate kanomo age'ya fakaliteka anuma'a aifakalika me namio huka hapaiyo.” huno hie.

²⁵ Higeno aiyayeno ala sauve kanomotega via'amo mage huno hapaiye “Aupa'a ti falemate Yonina age'ya fakaliteka anuma'a yopafi maleka me namio.” huno hie.

²⁶ Higeno ala sauve kanomo'a haviteno aipamo'a tusi'a kana'age higeno Anumaya Koti aulagafima huno lokiya vaimalea yafe'ene maiya vayafe'ene agesa haviteno mage huno hie “Ani muna'mo kea he fala'okigahue.” huno hie.

²⁷ Higeno aupa kano'a nago ati kano'a huteno mage huno hapaiye “Yonina age'ya mo fakalika anuma'a alika eno.” huno higeno kina nopi via'amo Yoni age'ya mo fakalitalene.

²⁸ Fakaliteno anuma'a yopafi maleno alino ea'amo ani muna'mona memigeno ita'amona alino amine.

²⁹ Amige'ya Yoni'enema tokae'ya nemaiya anaga'mo'ya ani kea havite'ya u'ya augafa'a

moli'ya yafakapi mo hevaitenae.

Yisasi'a faefu tauseni'a (5,000) vayamogami kavela amamine.

³⁰ Aposolo vayala Yisasitega ete'ya muki'a humainaya kava'ene humaveliya kene e'ya me hapaiminae.

³¹ Me hanepaige'ya muki'a vea'mo'ya agaitega ne'u'ya ne'e'ya mai'ya hageno Yisasi'enema tokae'ya nemaiya anaga'mo'ya kave'amima nesaya kana'amia omalea yafe Yisasi'a mage huno hie “Egeta tagaitige ka'me kotega umaifalu hamano.” huno hie.

³² Hige'ya amakai'amige tipi kalefi haisaga humai'ya ka'me kotega ugahe umainae.

³³ Vage'ya muki'a vea'mo'ya amakete'ya amaugosafina ago agemainaya vayalegi'ya kuma'amileti mopafi amaiya ye'ya uhagote'ya ani ka'me kotega uva'yi humainae.

³⁴ Uva'yi hageno Yisasi'a tipi kalefiti asaga hulavino ageana muki'a vea'nea elitalu humaiya veala amaketeno agesa mage huno havie “Ma vea'nea sipi sipi kana hu'ya mainayanagi kava yagaisaya vayala omainae.” huno agesama havia yafe kalagi aimateno alu ke alu kea hamapaiye.

³⁵⁻³⁶ Hamanepaigeno yagemo'a tavi falegahe hige'ya agai'aenema tokae'ya nemaiya anaga'mo'ya agait e'ya mage hu'ya hae “Ma kumala vaya omai kuma hanegenon yagemo'a tavi falegahe nehiafe ma veala humatesanage'ya u'ya nago'a vea'mogami hoyafiti'ene notegati'ene nesaya kave'amia mo miya hisae.” hu'ya hae.

³⁷ Hageno Yisasi'a mage huno hamapaiye “Tamakaya tamakaitami nesaya kavela amamiho.” huno hige'ya agaifena mage hu'ya hae “Nago kanomo'a tu hataleti'a (200) kanafi ali'ya aliteno ani moneleti kosa hesia maya miya ohile'asine. Tagaya ani moneleti mo miya hulita ani maya memamisune hunageka nehano?” hu'ya hae.

³⁸ Hageno Yisasi'a mage huno hie “Mogeho na'magi maya hane?” huno hige'ya u'ya mo-gayana hige'ya “Faefu'a (5) mayagi tole noy-amegi huno hane.” hu'ya hae.

³⁹ Hageno Yisasi'a mage hie “Muki'amogatama alitalu hute hute hutama kanale apepate mopale maiho.” huno hie.

⁴⁰ Hige'ya fifti'a (50) veala nagopi alitalu hu'ya maige'ya vani hataleti'a (100) veala nagopi alitalu hu'ya mainae.

⁴¹ Yisasi'a faefu'a (5) mayaene tole noyamene aliteno anafinaga agesaga huno ne'ageno Anumaya Kotitega ani kavefe huno muse huteno maya kofa huno agai'aenema tokae'ya nemaiya anagala amamige'ya ali'ya fako hutele hu'ya veala ne'amamigeno tole noyamene kolino muki'a vea'ma nesayafe amamine.

⁴² Amamige'ya muki'amo'ya ne'ya amamu hae.

⁴³ Amamu hige'ya atalaya mayaene noyamene atupatapa'a alitalu hu'ya kupi aite'ya tuelufu'a (12) kupi aigeno havatemaine.

⁴⁴ Ani kave'ma nemainaya vayala faefu tauseni'a (5,000) vemo'ya nemainae.

Yisasi'a ti agupile umaine.

⁴⁵ Aupa'a Yisasi'a agai'aenema tokae'ya ne-maiya anagafe mage huno hie “Tamakaya nagaila nenataletama hagotetama tipi kalefina hais-aga humaitama atu kaiyaga Petesaita kumatega utege'na nagaya veala humatesuge'ya viho.” huno hie.

⁴⁶ Viho humatege'ya utageno Yisasi'a Anumayamotega ke huno havigegahe ago'yafi haimaine.

⁴⁷ Haino mainegeni hanikigeno tipi kalemo'a tikotumona amu'nopi utegeni Yisasi'a agai'age ti agegayale maine.

⁴⁸ Maineno ageana amaulegati yasimo'a ea'amo tipi kalemona meyetu fegeteana o'vigeno Yisasi'a ageteno kotigahe hia avametega ti kotumona agupile via'amo amakaitela momakasegahe hie.

⁴⁹ Amakasegahe ti agupile vianagi ene'lege'ya agete'ya amakesa mage hu'ya haviye “Hakalo ne'efi?” nehu'ya “Avovo.” hae

⁵⁰ Avovo hu'ya tusi'a koli hute'ya atali talu hayanagi aupala amakaifena mage huno hie “Kolia ohutama maiho. Nagaya ne'ogi tokiya vaitama maiho.” huno hie.

⁵¹ Huteno tipi kalefi haino amakai'ene ne-maiyana yasimo'a taga hige'ya ani vaya'mo'ya tusi'a amama'yoge humainae.

⁵² Yisasi'a tokiya'aleti kave'ma amaminea yafena amaku'amo'a ha'yagino atalako hige'ya aepa'a havilama ohunae.

Yisasi'a kasago'ya Kenesale veala kali'amia alino kanale humatene.

⁵³ Ti kotuna takae'ya Kenesale kotega uva'yi hute'ya hatilavi'yama vayana tipi kalea nofiteti ayetenae.

⁵⁴ Tipi kalefiti hatilavino ne'vige'ya aupa'a vea'mo'ya Yisasina augosafina agemainae.

⁵⁵ Agete'ya note note amaiyaye'ya ute ete hu'ya kali veala hagifanale amavale'ya “Yisasi'a ma kumate maine.” hu'ya haya kea havite'ya agaite amavale'ya etele humainae.

⁵⁶ Yisasi'a vilega osi kumatelo ala kumatelo talapinagao kali veala amavale'ya kuma amu'nopi momatene'ya Yisasifena mage hu'ya havigae “Kanale kenakamo atupalela avate hisuno?” hu'ya hate'ya avate humainaya veala kalimo'a kanale humatene.

7

Anumaya Koti kahegi kemo'a tototimogami kemono agasemaine.

¹ Nago'a Falasia vaye'ene kahegi kema havilinaya anaga'ene Yelusalemuti Yisasite emainae.

² Emaine'ya agayana nago'a Yisasi'ene tokae'ya nemaiya anaga'mo'ya amayana sese ohu'ya kavela nenage'ya amakemainae*.

³ Falasia vaye'agela omainagi muki'a Yuta vea'mo'yaene amakinagomo'ya humainaya kava akave male'ya amayama sese'ma ohayana kavela onenagi sese hute'yage nena.

⁴ Situatega uge'yama enu'ya tima ofalesayana onegahagi tina falete'yage amaugafamo'a hilato hutege'ya kavela nena. Ani yama'agelomagi nayona vaya'mo'ya kahegi kea tokiya'age hu'ya humainaya kehe havi'ya masuene yopaene susufanene muki'a sese nehae.

⁵ Falasia vaya'ene kahegi kema havilinaya anaga'ene Yisasife mage hu'ya me hae “Na'a hige'ya kagai'enema tokae'ya nemaiya anaga'mo'ya taginagomogami kavala ne'atale'ya ani kea atagae'ya kave'ma negahena amayana sese nohae?” hu'ya havigae.

⁶ Hageno Yisasi'a kenona'amia mage hie “Tamakaya vagala vaya mainae. Aisaiya'a Anumaya Koti aune kanomo'a tamakaifena tamage huno Anumaya Koti auta'mafina mage huno humaineane 'Ani nofi vea'mo'ya amavayaleti hu'ya nagai nagia alisaga nehayanagi amaku'amo'a alulega hanege'ya ani'a kavala nehae.

⁷ Amakaya ma mopafi vea'mogami amavayafiti humainaya kahegi kehe mage humainayane 'Mani kea Anumaya Koti ke hanegi akave maleho.' hu'ya humainayanagi nagai nagia alisaga hisaya kavala ohu'ya afa kava mai'ya nehae.' huno kaemaleneane.

⁸ Anumaya Koti kahegi kea ataletama vea'mo'ya malenaya kea akave nemalae.

⁹ Huteno nago'ene mage huno hie “Tamakaitami tamakinagomogami kava'ma akave nemalaya yafe Anumaya Koti kahegi kea ago atalena.

10 Mosese¹a mage huno humaineane

‘Tamakaya itatami afotamimogami amakia alisaga nehutama ke¹amia veganokanola ohutama amaiya¹afinaga maiho. Nago¹a vea¹mo¹ya ita¹afo¹amimogamima kamugema vaimatesayana faligahae.’ huno humaineane.

11-12 Humaineanagi tamakaya mage hutama hae ‘Nago kanomo¹a ita¹afo¹amogani anaya hisia monema hanesigeno¹a ita¹afo¹amoganina anayama ohinuno¹a mage huno hisie ‘Ani monea Anumaya Kotina amisua yane hu¹na humainoe.’ huno hinunofena ita¹afo¹amoganina nago¹lene anayama ohisiana kanalele.’ hutama nehae.

13 Ani kema haya yafe tamakinagomogami kavala akave malenayafe Anumaya Koti kehena ‘Afa yane.’ hutama muki¹a ani kavala nehae.” huno humaine.

Vea¹mogami amaku¹afima oni¹ya¹age nehamaiya yane.

14 Yisasi¹a kasago¹ya veala agaite esaya yafe nago¹ene ke hige¹ya ageno mage huno hie “Tamakaya mani kea havilama hutama haviho.

15-16 Nago¹a nesaya yamo¹ma tamavayafi visia yamo¹a tamaku¹afina oni¹ya otamahaugahigi tamaku¹afiti¹ma hatilavisia yamo ali falote hisigeno tamaku¹amo¹a oni¹ya¹agela hugahie.” huno hie.

17 Huteno ne¹amataleno nopinaga haino mainege¹ya agai¹enema tokae¹ya nemaiya anaga¹mo¹ya Yisasife mage hu¹ya hae “Kagaya

mani avame kemona aepa¹a hugeta havimano.” hu¹ya havigae.

¹⁸ Havigageno Yisasi¹a mage huno hie “Tamakai¹enena havilama ohutama nehao? Tamakaya ohavinao muki¹a yana tamavayafima nesaya yamo¹a oni¹ya otamahaugahie.

¹⁹ Tamavayafi naya¹amo¹a tamaku¹afina o¹uno afa¹a tamaipafike taviteno haenaga¹a aifayola-gafina taviteno afa ya kana nehie.” huno hie. Mani kema hiana muki¹a kavela afa¹a nesaya kaveke¹ya hane huno hie.

²⁰ Huteno mage huno hie “Nago¹a yama tamavayafiti¹ma hatilavisia kemo¹a tamaku¹amona alino oni¹ya¹age nelamahaiye.

²¹⁻²² Vea¹mogati tagu¹afiti¹ma efalote hia yamo¹a ma¹a huno ali falote nehie kanale ohunea tagu tagesa nehavuna ya¹ene a¹ne muna¹nene kumai he ya¹ene musufaya hu ya¹ene vaya hamaefali ya¹ene alu kanomo a¹ne amavayu hu ya¹ene alu kanomo yafe age ha¹ye hu ya¹ene kefo ya¹ene havige huno savale savala hu ya¹ene age lamaha¹ye nehaya ya¹ene veamogami taipa havita haviya hune¹amatona ya¹ene veafe havige humate ya¹ene taugafa alita hai ya¹ene kema ohavi ya¹ene tagu¹afitila ali falote nehie.

²³ Muki¹a ani kefo yama nehaya yana tamaku¹afiti efalote hia yamo tamaku¹afina oni¹ya¹agela humaine.” huno hie.

Fonisia kotega a¹mo¹a Yisasina agu¹a amitafa humaine.

24 Yisasi'a ani kumala ne'ataleno Taiya kuma'mo kaiyaga umaineno agai'ama anile'ma emainea yafena vea'mo'ya ohavisae huno nago nopi haino maiyanagi afa'a agai'a fala'okigahie. Vea'mo'ya ago haviye.

25 Aupa'a nago a'mo'a Yisasi avagea haviteno eno aiyafi ale'ya meyemaine. Ani a'mo muna'mona agupi Kefo Avamula mainea alagino.

26 Isaleli vea omainea alagino Kaliki ke nehuno Fonisia nofi ale. Silia kotega alagino muna'amona agupi mainea Kefo Avamu* anati-talesie huno auka'ya huno havige.

27 Yisasi'a mage huno hie “Nafa'nemo'ya hagote'ya kavela negahae. Havigu nafa'nemogami kavela hamanafaleta kalayagamogami amamisunana haviya hugahie.” huno hie.

28 Higeno ani a'mo'a mage huno hie “Anu-mayamogae tamage hananagi nafa'nemo'ya nenageno osi atupa'a sipaleti asaga hulavia yana kalamo'ya yogi'ya nena. Kagaya ani kava huka nagaya Isaleli a omainoanagi osi'a naha'mao.” huno hie.

29 Higeno Yisasi'a ani afena mage huno hapaiye “Keka'a ago hanage'na havuafe nokalega vuo. Kefo Avamu'mo'a munakamona ago ataleno vie.” huno humaine.

30 Higeno noma'alega via'amo mogeana Kefo Avamu'mo'a ago ataleno vigeno muna'amo'a kanale huno sipale faemainegeni ita'amo'a moglemaine.

Yisasi'la nago aifo kanomo agesaene avayaene alino kanale hutene.

³¹ Yisasi'la Taiya kumala ataleno aiyahae huno Saitoni kumala agaseno via'amo teni'la (10) kuma hanelega mogaseno Kalili ti agegayalega uva'yi humaine.

³² Uva'yi higeya vea'mo'ya nagola yuna aifo kanoa Yisasitega avale'ya vayana ani aifo kanomo'la hagifali ke nehatagege'ya Yisasife mage hu'ya hae “Augafale kayateti avate hisane.” hu'ya havigae.

³³ Yisasi'la ani kanoa ne'avaleno veala amataleno faitega anakai'anige umaine'ana aya avoyaleti aifo kanomona agesafi vaiteno avetu'na heno ayateti avefu'nale avatemalene.

³⁴ Malegeno anafinaga agesaga huno “Vaeha auso'nio.” huteno agaifena agai'la kefiti mage huno hie “Efata.” huno hie. Tagai kefina “Kagesa akalo hino.” huno hapaiye.

³⁵ Higeno agesamo'la akalo higeno avefu'namo'la kanale higeno aikalo huno kea kea hie.

³⁶ Yisasi'la mage huno hie “Nago'la veala mani yafena hama'opaiho.” huno kahegi mateanagi ani kea hu'ya atile male hu'ya muki'la vea'mogami amakesale mohu mehu humainae.

³⁷ Hage'ya haviya vea'mo'ya tusi'la amama'yo aige'ya mage hae “Muki'la yana aligeno kanale kanale nehie. Yuna aifo vayala aya malege'ya kea nehaviye. Aifo vayala ke'amia ali falote hune'amamie.” hu'ya nehae.

8

Yisasi'a fo tauseni'a (4,000) vaya kavela amamine.

¹⁻² Nago yupa kasago'ya vea'mo'ya alitalu hu'ya maiyana nesaya yana omalegeno Yisasi'a agai'aenema tokae'ya nemaiya anagafe ke hige'ya ageno mage hie “Mani veala tagufa (3) yupa nagai'ene mainageno nesaya kave'amia omalea yafe nahau hune'amatoe.

³ Nago'a veala aya'aya kotegati emainagi havigu amatalesuge'ya katega ne'visageno amakatesige'ya amaugetunatu hu'ya takatiyafena nonahaiye.” huno hamapaiye.

⁴ Yisasi'enema tokae'ya nemaiya anaga'mo'ya mage hu'ya hapaiye “Mauna kola vaya omai kolagi hanateti maya alita ani vea'nea amamisune?” hu'ya havigae.

⁵ Hageno Yisasi'a mage huno hamavige “Tamakaya na'magi'a maya hane?” huno hige'ya mage hae “Tagaipina seveni'a (7) maya'age hane.” hu'ya hapaiye.

⁶ Hageno Yisasi'a muki veafena “Mopale maiho.” huno hige'ya mopale mainageno Yisasi'a ani seveni'a (7) maya alino Anumayamotega muse huno havigeteno aposite aposite huteno agai'aenema tokae'ya nemaiya anagala amamige'ya muki'a veapina vaya kaimainae.

⁷ Nagoke okasi noyame kano'a hanegeno Yisasi'a Anumayamotega ani noyamehe muse

huteno “Amamite amamite hiho.” huno hige'ya
vaya kaimainae.

⁸ Kaige'ya muki'a vea'nea nageno amamu
hige'ya atalaya maya atupayaga Yisasi'enema
tokae'ya nemaiya anaga'mo'ya alitalu hute'ya
seveni'a (7) kupi aihavatemainae.

⁹ Ani kave'ma naya vene'nea fo tauseni'a
(4,000) vaya'mo'ya nemainae. Netageno Yisasi'a
humatege'ya umainae.

¹⁰ Utageno Yisasi'a agai'aenema tokae'ya ne-
maiya anaga'ene tipi kalefi haisaga humai'ya
Talamanuta kumatega umainae.

*“Tokiya'age avame yana hugeta agamano.”
hu'ya hae.*

¹¹ Falasia vaya'mo'ya Yisasite e'ya agai'ene
ke vai'ya ayevataga hisaya yafe mage hu'ya
hae “Kagaya ikapinagati tokiya'age avame yana
hugeta agamano.” hu'ya hae.

¹² Hageno Yisasi'a aipa havino kana'age
huteno mage huno hie “Na'a higetama
meni kanafima mainaya vea'mogatama
tokiya'age avame yafena nahavinegae? Tamage
tamahapaisua kea haviho meni kanafima
mainaya vea'mogatamina tokiya'age avame
yana tamaveotigahue.” huno hie.

¹³ Huteno ne'amataleno tipi kalefi haisaga hu-
maino atu faliga ugahe umaine.

*Falasia vaya'ene Heloti'ene nehaya kea kai-
hamema halenegia yate huvame ke humaine.*

14 Yisasi'enema tokae'ya nemaiya anaga'mo'ya tima lakae'ya vayana amakekani'ya nagoke maya kano'a ali'ya umainae.

15 Ali'ya vayanagino Yisasi'a mage huno hamapaiye “Tamakaya Falasia vaya'ene Heloti'ene amakupima hanea yana agelama ohune'ya amavayaleti havigema nehaya yamo'a kaihamemo halenegia avamete huno halegino alakefa hisia yafena ka'ye ho.” huno hie.

16 Hige'ya ani vaya'mo'ya amakai'amia huge havige nehu'ya mage hae “Tagaya maya o'alita emainona yafe nehie.” hu'ya amakai'amia hae.

17 Hageno Yisasi'a ani vaya'mo'ya haya kea ago haviteno mage hie “Na'a higetama ‘Kavetia alita omenone.’ hutama tamakaitamia huge havige nehae. Tamakesa havilama hutama ohavinao? Tamaku'amo'a tilemainegetama nohavio?

18-19 Tamaulaga haneanagi agelama nohao? Tamakesa haneanagi havilama nohao? Faefu'a (5) maya ali'na aposite'na faefu tauseni'a (5,000) veyagama amaminoa yafena tamakekanitama mainao? Na'magi kupi atupatapa aimalageno havatemaine?” huno hamavigege'ya “Tuelufu'a (12) kule.” hu'ya hapaiye.

20 Hageno mage huno hie “Seveni'a (7) maya ali'na aposite'na fo tauseni'a (4,000) vaya amamuge'ya nete'ya na'magi kupi atupatapa aigeno havatemaine?” huno hamavigege'ya “Seveni'a (7) kule” hu'ya hapaiye.”

21 Hageno mage huno hie “Na'a higetama no-

haviye?” huno hamavige.

Yisasi'a nagola aulaga asu humai kanoa Petesaita kumate alino kanale hutene.

²² Petesaita kumate uva'yi hage'ya vea'mo'ya nagola aulaga asu humainea kanoa avale'ya Yisaisite ne'e'ya mage hu'ya hae “Museka'a nehunagi augafale avate huo.” hu'ya hae.

²³ Hageno Yisasi'a aulagama asu humai kanoa ayate alino kumala ataleno avaleno malaga via'amo aulagafi avetu'na heteno aya nemaleno mage huno havige “Nago yana ne'agano?” huno havige.

²⁴ Higeno agesaga huno ageana higeno mage huno hie “Veala ne'agoge'ya yosa kana hu'ya vaiyatete nehae.” huno hie.

²⁵ Higeno Yisasi'a nago'ene ani'a huno ayana aulagale malegeno aulagamo'a kanale higeno agemaine. Aulaga age haleno muki yana kanale'ya huno agemaine.

²⁶ Agegeno Yisasi'a mage huno hie “Ma kumatela o'uka eteka nokalega vuo.” huno hie.

Pita'a hufalote huno “Yisasi'a Anumaya Koti'a taugafa aligatigahema hutenea kanoe.” huno humaine.

²⁷ Yisasi'a agai'aenema tokae'ya nemaiya anaga'ene Sisalia Filipai kotega hanea kumate ugahe katega ne'uno mage huno hamavige “Vea'mo'ya nagaifena ta'e hu'ya nehae?” huno hamavige.

²⁸ Hamavigege'ya kenona'a mage hu'ya hae “Nago'a vea'mo'ya kagaifena ‘Tima fale

ne'amatea Yoni'e.' hu'ya hage'ya nago'a
vea'mo'ya 'Iaiya maine.' hu'ya hage'ya nago'a
vea'mo'ya 'Anumaya Kotina aune kano'a maine.'
hu'ya nehae." hu'ya hapaiye.

²⁹ Hapaigeno Yisasi'a mage huno hamavige
"Tamakaya nagaifena ta'e hutama nehae?" huno
hamavigegenno Pita'a kenona'a mage huno hie
"Kagaya Kalaisigae Anumaya Koti'a taugafa ali-
gatigane huno hugatenea kano mainane." huno
hie.

³⁰ Higeno Yisasi'a amaumono maleno mage
hunno hie "Mani kea nago'a veala hamaopaiho."
hunno humaine.

Yisasi'a "Falite'na hetigahue." hunno humaine.

³¹ Ani yupa Yisasi'a agai'aenema tokae'ya
nemaiya anagafena haenagama falote hisia
yafe aepa heno hamapaino mage hunno hie
"Nagaya ikapinagati emainoa kanoa vaya'mo
natenea kanomo'na tusiya hu'na nagata yana
alisugenno Yuta vayatamaene monno note kava
vaya'ene kahegi kema havilinaya anaga'ene
amakave'no hunate'ya nahaesage'na falisuge'ya
komufi hevainatesagenno naugafamo'a tole yupa
maitenage'na tagufa kanale falimainesufitila
ete'na hetigahue." hunno hamapaiye.

³² Hufalote hunno hamapaigenno Pita'a Yisasina
faitega avaleno mage hunno mo hapaiye "Kagaya
ani kea ohuo." hunno hie.

³³ Higeno Yisasi'a maiyahae hunno nago'a
agai'aenema tokae'ya nemaiya anagala
amaketeno Pitafe keamakino mage hunno hie

“Sataniga mai halenato kagaya Anumaya Koti havimainea agu'agesa kanale'ya huka nohavinagi vaya'mo'ya kahapaiya amaku amakesa nehavine.” huno hie.

³⁴ Huteno kasago'ya alitalu haya vea'nene agai'aenema tokae'ya nemaiya anagafe'ene ke hige'ya ageno mage huno hamapaiye “Nago'a vea'mo'ya nakave visaya amakesa havinu'yahena amaugafama ali'ya hai yana amakave'no hutete'ya nagai'ma nagata aisige'nama falisua avamete amakesa havite'ya yafaga yosa kofi'ya nakave visae.

³⁵ Nago'a vea'mo'ya hamaimu'ma hanesige'ya mai ya'amima atafa hutalako hisageno'a ani yamo'a fanane hugahianagi nago'a vea'mo'ya nagai'fe hu'ya nagai kanale mono kema hamapaisaya yafema mai ya'amiene hamaimu'amiene atalesageno'a ani mai ya'ami aligatisige'ya agola maigahae.

³⁶ Nago kanomo'a muki'a ma mopafi afeno yama alisia yafe faliteno agola maige maige hisia haimu'a atalesiana alimainea mone afeno yamo'a hana'a huno ha'maegahie? A'ao ha'omaegahie

³⁷ Falitesigenofena agola maige maige hisia haimula eteno alisia yafe muki'a ma mopafi mone feno'yana afa'a atalegahianagi aya ohugahie.

³⁸ Nago'a vea'mo'ya meni kanafina kefo yama nehaya vea'nene, Anumaya Koti kema atalete'ya alu kate ne'vaya vea'nene, maine'ya nagai kene

nagai'nienefema hu'ya 'Aote'yama'ae.' hu-natesage'na nagaya ikapinagati emainoa kanoa vaya'mo natenea kanomo'na esua yupa Ne-nafana tokiya hale yama'aene alu aotage ensole anaga'mo'yaene ete'na esuana ani'a hu'na ani vea'nehena nagaye hu'na "Tamahaote'yatamie." hu'na humategahue." huno humaine.

9

¹ Yisasi'a mage huno hamapaiye "Tamage hu'na tamahanepauve male'ma heti'ya mainaya veala nago'amogatama ofalinesageno hagoteno Anumaya Koti kava yagaisia yamo'a himamu yama'aene efalote hinagetama agetetama haenaga faligahae." huno hamapaiye.

Yisasina augafamo'a alino alu kava humaine.

² Yisasi'a sikisi'a (6) kana maiteno Pitana Yemesina Yonigamina amavaleno aya'aya ago'yafi hai'ya amakai'amige maine'ya agayana Yisasi augafamo'a alino alu augafa kalimaine.

³ Kena'amo'a mopafima mainaya vea'mo'ya sese nehageno efe'age nehia avamete ohunegi tusiya huno efe'age huno alave alave humaine.

⁴ Tole kanolatana Mosese'ene Ilaiya'ene eva'yi hu'ana Yisasi'ene kaiyeke neha'age'ya agemainae.

⁵ Pita'a Yisasife mage huno hie "Hulavenelina kanomogae tagaya male maunana kanale nehie. Tagaya katega nona tagufa (3) kilamatesune kagaila nagolagi Mosesena nagolagi Ilaiyana nagolagi huta kilamatesune." huno hie.

6 Tusiya hu'ya kolima haya yafe Pita'a 'Na'ane ke hisue?' huno aghesa havigeno mani kea humaine.

7 Ani kea hanepaigeno agola sia'mo'a eva'yi huno melino aiso humategeno ani siapinagati age aino mage huno hie "Mani nafa'nea nagai nafa'negi nagu'afifena nenahaiya nafa'negi agai kea haviho." huno siapinagati humaine.

8 Hige'ya aupa'a moge mege hu'ya agayana nago'a vayala omaigeno Yisasi'a agai'age maine'ya ageminae.

9 Agete'ya ago'yafitila enelavi'ya Yisasi'a kahegi maleno mage huno hamapaiye "Manima agaya yafena nago'a vea'nea hama'opaiho. Haenagama nagaya ikapinagati emainoa kanoa vaya'mo natenea kanomo'na falimainesufiti hetisua yupa hamapaigahae." huno hie.

10 Hige'ya ani kemo akave male'ya hama'opainagi "Falimainesufitila ete'na hetigahue." huno hia kemo aepa'ahe atiyeyu'ya amakai'ami huge havige hae.

11 Mage hu'ya Yisasina havigae "Na'a hige'ya kahegi kema havilinaya anaga'mo'ya Ilaya'a hagoteno etesigeno Anumaya Koti'a hutesigeno taugafa aligatisia kanoa egahie hu'ya humainae?" hu'ya havigae.

12 Hageno Yisasi'a mage huno hie "Tamage Ilaya'a hagoteno eno muki'a yana melino talo tala hugahie. Ani'a hu'ya nagaifena Anumaya Koti' autamafina kaemalenayane "Ikapinagati emainoa kanoa vaya'mo natenea kanomonina

amakave¹no hunate¹ya ali haviya hunatesageno naugafa nagata aigahie.” hu¹ya nagai¹fena humainayane.

¹³ Tamahanepauve Ilaya¹a ago ege¹ya Anumaya Koti auta¹mafina kaemalenaya avamete hu¹ya amakai¹amia hamaiya avamete agaila havi kavala hutena¹e.” huno humaine.

Yisasi¹a nagola manani¹ya ne¹agea nafa¹nea alino kanale hutene.

¹⁴ Nago¹a agai¹aenema tokae¹ya nemaiya anagatega eva¹yi hu¹ya agayana kasago¹ya veala anile alitalu humainage¹ya kahegi kema havilinaya anaga¹mo¹ya Yisasi¹enema tokae¹ya nemaiya anaga¹ene mo huhaviya me huhaviya hu¹ya kea vaiye.

¹⁵ Ne¹vaigeno muki¹a vea¹mo¹ya Yisasina agete¹ya tusi muse nehu¹ya amaiyaye¹ya moli falu fala hutena¹e.

¹⁶ Yisasi¹a mage huno hamavige “Na¹afene hutama mo huhaviya me huhaviya nehae?” huno hamavige.

¹⁷ Higeno nagola anile maiya kanomo¹a mage huno hie “Humavenelina kanomogae Kefo Avamu¹mo¹a nafa¹ne¹nimona agupi haimaineno nafa¹ne¹nimo avayale maihiya humainege¹na kagaitega avale¹na ne¹oe.

¹⁸ Ne¹ogi Kefo Avamu¹mo¹a atafa huteno atalegeno takatino faemainegeneno agalemo¹a selu selu nehigeno ave kume neganeno augafamo¹a apipupapu nehige¹na kagai¹enema tokae¹ya nemaiya anagafe ‘Kefo Avamula anatitaleho.’

hu'na huana ya hugete'ya anatio'atalenae.” huno hie.

19 Higeno Yisasi'a mage huno hie “Ae meni kanafima mainaya vea'mogatama nagaifena havitama tamakupina omalenetama tamametitia nohaya vea'mogatama na'magi kanafi tamakai'enena mainesugetama havigahae? Ohaviya yafena kasalo nenahae. Na'magi kanafi tamakai'enena kanale'ya hu'na ako hu'na maisue? Nagaitega avaletama eho.” huno hie.

20 Hige'ya avale'ya ageno Kefo Avamu'mo'a Yisasina ageteno ani nafa'nemona alino kigepagige hia kava huteteno ali takatitalegeno ani nafa'nemo'a mopafi asaga hulavino kasegase nehigeno agalemo'a selu selu humaine.

21 Higeno Yisasi'a nefafena mage huno havige “Na'magi kanafi ani'a haumaine?” huno havigegeneno nefa'a mage huno hie “Osi nafa'ne mainegeneno ani'a haumaine.

22 Muki'a kanafina Kefo Avamu'mo'a ayelakatitalegeno atafi'ene tipi'ene haefalisia kava nehige'na kagaya kanale humainenuka kahau hulateka taha'mao.” huno hie.

23 Higeno Yisasi'a mage huno hie “Na'a higeka nagaifena kanale humainenuka naha'mao huka nehane? Nagaifema agupi maleno ametiti nehia kanomo'a muki'a yana alu ya alu yana afa'a hile'asinagi.” huno hie.

24 Higeno aupa'a ani nafa'nemona nefa'a mage huno hie “Nagaya kagaifena nagupi male'na nametiti nehuanagi nagupi male'na nametiti hua

yanimo'a aupa nehigi alika aya'aya hunato.”
huno hie.

²⁵ Hanepaige'ya veala tusiya hu'ya amaiyaye'ya elitalu hageno Yisasi'a ne'amakeno Kefo Avamufena kemakino mage huno hie “Kagaya Kefo Avamu'mogae agesama ailileka avaya alilu kimainana Kefo Avamu'mogae hai kahapauve agupitila hatilavika vuo. Nago'a kanafina nago'ene agupina haiofalo.” huno hutene.

²⁶ Higeno Kefo Avamu'mo'a ala kenake nehuno ani nafa'nemona tusiya huno alino kigepagige hia kava huteteno hatilavino ataleno vigeno ani nafa'nemo'a fali vaya kana huno faemainege'ya kasago'ya vea'mo'ya “Ago falimaine.” hu'ya hae.

²⁷ Nehageno Yisasi'a ayate alino avalesaga hutegenon hetimaine.

²⁸ Haenaga Yisasi'ene nopinaga haino mainege'ya agai'aenema tokae'ya nemaiya anaga'mo'ya amakai'amige maine'ya mage hu'ya havigae “Tagaya ya hugetonana ani Kefo Avamula na'a higeta anatio'atalenone?” hu'ya hae.

²⁹ Hageno Yisasi'a mage huno hamapaiye “Ma'a augafa Kefo Avamula alu yatetila o'اناتگاهي Anumaya Kotitega ke huta havigesaya yatetike anatigahae.” huno hamapaiye.

*Tole kanale Yisasi'a “Falite'na hetigahue.”
huno humaine.*

³⁰⁻³¹ Ani kumala ne'atale'ya Kalili kotegama vayana “Veal'mo'ya visua kumafena ohavisae.” huno hige'ya ako hu'ya falaki'ya ne'vageno agai'aenema tokae'ya nemaiya anagala Yisasi'a mage huno humavenelie “Ikapinagati emainea kanoa vaya'l'mo atenea kanoa agaila atafa hu'ya avale'ya vaya amayapi atesage'ya haesageno faligahie. Faliteno hevaitesageno tole yupa komufi maiteno tagufa (3) kana falimainesifitila hetigahie.” huno hamapaiye.

³² Anima hamapaiya kea havilama ohaya yafe koli'a hu'ya haviokenae.

Ta ala kanoa maine?

³³ Kapaneamu eva'yi hute'ya Yisasi'a nopi haino maineno amakaife mage huno hamavige “Katega na'ane kea kea hume hume emainae?” huno hamavige.

³⁴ Katega ne'e'ya ma ke hume emainae “Kagaya ala kano mainapi nagaya kagase'na ala kanoa mainoe?” hu'ya huge havige hume aya kehenagi'ya kea ohu'ya mainae.

³⁵ Mainageno Yisasi'a mopale maineno “Ege'na tamahapaino.” huno hige'ya tuelufu'a (12) anagala ageno mage huno hamapaiye “Nago kanomo'a 'Ala kanoma maisue.' hinunofena haenagalafa maineno muki'a veala kayo kayo'ma humatesiana ala kano maigahie.” huno hamapaiye.

³⁶⁻³⁷ Huteno nagola okasi nafa'nea avaleno amu'no'amifi hetiteneno avalesaga huno anukilineno mage huno hie “Nago'a veal'mo'ya na-

gaifema havi'ya ma'a augafa osi nafa'nema avale'ya falu fala hisayana nagai'ene navale'ya falu fala hunenatae. Nagai'ma navale'ya falu fala hisayana hunatenea Nenafa'ene avale'ya falu fala hune'atae.”

Veamo'ya kamema huotatesayana tagai kanapa maigahae.

³⁸ Yonila mage huno humaineane “Hulavenelina kanomoga tagaya agonana nago kanomo'a kagai kagile Kefo Avamula vea amakusafinagatila anatine'atalegeta ne'ageteta takave'ma nohia yafe ‘Ani'a ohuo.’ huta ‘A'ao.’ hutenone.” huno hapaiye.

³⁹ Yisasi'a Yonife mage huno hapaiye. “Ani kanoa alitama ‘A'ao.’ huo'ateho. Nago'a veamo'ya nagai nagile tokiya'age ali'yama alisayana aupa'a nagaifena huhaviyana huonategahae.

⁴⁰ Veamo'ya kamema huotatesayana tagai kanapa maigahae.

⁴¹ Tamage tamahanepauve nago'a veamo'ya tamakayama Kalaisi nafa'nema mainaya yafe yasi tima tamamisagetama nesayana anona'a kanale miya aligahae.”

Kefo au'ava yamo'a Yisasife amakupi male'ya ametiti nehaya yamona ali haviya nehie.

⁴² “Nagola osi nafa'ne'ni, nagai'fe havino agupi maleno ametiti nehisia nafa'nehema nago'a veamo'ya ‘Kefo yama huo.’ hu'ya havi kapima avaletesayana tusi'a havi kava nehayanagi'na

tusi¹a kana ya amamigahue. Ala yafagefaleti ani kanomo age¹yafi male¹ya nofi kitete¹ya hage lipi haga¹yu hutalesayana afa ya kana kana ya haneanagi nagaya tusi¹a kana ya amamigahue.

⁴³⁻⁴⁴ Kayamo¹a 'Kefo yama huo.' huno kavaleno havi kapima katesigekahena ani kayana aifakalitalo. Aifakalitalesanana kanale hugahie. Kaugafamo¹a haviya humainesia kanoma maisanana ha¹no ohisia kahaimula hanesia kano maigane. Havigu tole kaya hanenageka kefo ya hisana kagesa kaminegeka kefo yama humainana yafe kavaleno hani yapi agola tegelege nehia atafi haga¹yu hugatalegahie.

⁴⁵⁻⁴⁶ Kaiyamo¹a 'Kefo yama huo.' huno kavaleno havi kapima katesigekahena ani kaiya aifakalika atalo. Aifakalitalesanana kanale hugahie. Kaugafa haviya humai kano maisanana ha¹no ohu kahaimula hanesia kano maigane. Havigu tole kaiyamo¹a kefo ya hisana kagesa kaminegeka kefo ya humainana yafe kavaleno hani yapi agola tegelege nehia atafi haga¹yu hugatalegahie.

⁴⁷ Kaulagamo¹ma agea yafema kefo yama hisana kagesa kaminagekahena ani kaulaga ali fa¹yika atalo. Ali fa¹yitalesanana kanale hugahie. Nagoke kaulaga hanesigeno Anumaya Koti¹a kava yagaimainea kumatela umaigananagi havigu tole kaulagamo¹a kefo ya hisana kagesa kaminegeka kefo ya humainana yafe hani yapi tegelege nehia atafi kavaleno haga¹yu hugatalegahie.

⁴⁸ Anima ata legelege nehia kumapi vea¹mo¹ya

ani atafi mainageno kani kafa'amimo'a ofal-isigeno atamo'a asua ohugahie.

⁴⁹ Hagemā kavete falea avamete huno veala muki'amogatamina ataleti falelamategahie.

⁵⁰ Hagea kanale ya haneanagi haga'age'ma nehia yama'a ha'noma hisiana hana'a hutama haga'age'ma nehia yama'a ali falote hugahae? Hage kana yana tamaku'afi hanesigetama alava hutama nagoke tamaku tamakesale kigi yokalo hutama maiho.” huno humaine.

10

Yisasi'a ve alavema apase yafe humaine.

¹ Yisasi'a ani kola ne'ataleno Yutia kotega via'amo Yotani timo'a ame kaiyaga uva'yi huno mainege'ya muki'a veala agaite melitalu hageno nehia kava huno nago'ene hamapaiye.

² Hamanepaige'ya nago'a Falasia vaya'mo'ya Yisasite e'ya ase ohisea kema hisiafene hu'ya nagola ayevataga hisaya kea mage hu'ya havigae “Nago kanomo'a a'ama atalesia agesa hisigeno'a kahegi kemo'a 'Afa'a atalegahie.’ huno humaineo?” hu'ya havigae.

³ Hageno Yisasi'a kenona'amia mage huno hamavige “Mosese kahegi kemo'a ani yafena na'ane humaine?” huno hamavige.

⁴ Hige'ya mage hu'ya hae “Mosese'a nagola kahegi kefina mage huno tahapaimaine 'Vemo'a a'amona avo kaeno ne'amino hutesigeno ha'no huno ugahie.’ huno humaineane.” hu'ya hae.

⁵ Hayanagi Yisasi'a mage huno hamapaiye
 “Tamakaya ke ohavitama veganokano haya yafe
 Mosese'a a'ma atalesaya kea kaemaleneane.

⁶⁻⁸ Kaemaleneanagi Anumaya Koti avopina
 mage huno humaineane

‘Ehe yupa Anumaya Koti'a vene a'ene talo
 humaleneane. Vene a'ene talo humalenea
 yafe nago kanomo'ma ita'afo'amoganima
 anataleno a'amo'ene ailokaeno maisiana
 ani tolemogania nagoke anaugafa
 kaliga'e.’ huno humaineane.

Na'a humaineafe nago'ene tolelatana omaiga'agi
 nagoke anaugafa kali'ana maiga'e.

⁹ Anumaya Koti'a ago alino hagelafimale-
 neanagino nagola ma mopale kanomo'a ani
 alavelatana mai ya'ania alino apase o'anatesie.”
 huno hie.

¹⁰ Mani kea huteno nopinaga haino maineno
 agai'aenema tokae'ya nemaiya anaga'mo'ya ani
 kehena havinegae.

¹¹ Havigageno mage huno hie “Nago kanomo'a
 a'ama ataleno alu a'ma aliana ani kanomo'a
 kumai kava huno hagote a'amona ali haviya
 hune'ate.

¹² Nagi nago a'mo'ma anau'amoma ataleno alu
 vele'ma viana ani a'mo'a kumai kava nehie.”
 huno hie.

*Yisasi'a “Nafa'neyaga amatalege'ya nagaitega
 eho.” huno humaine.*

¹³ Veamo'ya nafa'ne'amia avale'ya Yisasite
 “Aya malese.” hu'ya ne'age'ya agai'aenema

tokae'ya nemaiya anaga'mo'ya “Na'a ohiho.” hu'ya kemamakimainae.

¹⁴ Yisasi'a kema amamakiya yana ageteno haivaimateno mage huno hie “Nafa'neyaga amatalege'ya nagaitega eho. Ka heakio'amateho. Nafa'ne avamete maiya vea'mo'ya mage nehae ‘Tagaitige maunana tokiyatia omalegi Anumaya Koti kava yagailatesie.’” hu'ya hae.

¹⁵ Tamagelafa hu'na tamahanepauve nafa'ne avamete maisaya vea'mo'ya ‘Tagaitige maunana tokiyatia omaleafe Anumaya Koti'a kava yagailatesie.’ hu'ya ohisayana Anumaya Koti'a kava yagaimainea kumatela o'ugahae.” huno hie.

¹⁶ Huteno Yisasi'a ani nafa'neyaga amavaleno amanukilineno “Anumaya Koti'a kanale manua tamamisie.” huno amaugafale ayana malene.

Kasago'ya afenoma'a hanea kava kanomo'a Yisasi'ene kea kea humane.

¹⁷ Yisasi'a katega ugahe nehigeno nago kanomo'a aiyayeno ea'amo aule ale'ya meyeno mage huno havige “Kagaya kanale ya huka humavenelina kanomogae hana'a hute'na agola maige maige hisua nahaimula alisue?” huno hie.

¹⁸ Higeno Yisasi'a mage huno hie “Na'a higeka nagaifena ‘Kanale kano mainane.’ huka nehane? Anumaya Koti'a agai'age kanale kanoa maine.

¹⁹ Kagaya Anumaya Koti kahegi kea havilinane ani kemo'a mage huno humane ‘Vayala haegenofalino. Kumai he yana ohuo. Musufa yana ohuo. ‘Ma kanomo'a havi kava nehie.’ huka

havigehena kena o'valo. Havigea ayevataga huka alu vea'mo yana o'allo. Itakafokamo kea 'Kahaote'yaka'ae.' ohuo." huno hie.

²⁰ Higeno ani kanomo'a mage huno hie "Hulavenelina kanomogae nagaya nafa'nema mainoa kanaleti aepa he'na muki'a ani kema hana kea akave nemaloane." huno hie.

²¹ Higeno Yisasi'a ani kanoa ageana agaifena hau ayamopafima haiya yafena ageteno mage huno hie "Nago'a yafena kosa he'okatene. Nago kava'ene huo. Muki'a malenana mone afeno'yaka'a alika fako huka mone'amima omalenesia vea'nema amamisanageno'a Anumaya Koti'a ikapinaga afeno'yana kamigahie. Afeno'yaka'a fako huka amamite amamite huteka nakave eno." huno hie.

²² Higeno ani kanomo'a ani kea havianagi mone afenoma'lama kasago humainea yafe o'atalesia agesa haviteno augosamo'a atili kaegenoa aipamo'a tusi kana'age higeno ataleno umaine.

²³ Vigeno Yisasi'a agai'aenema tokae'ya nemaiya anagala moge mege huno ne'amakeno mage huno hie "Muki'a mone afeno'ya'amima hanesia vea'mo'ya kasageke humai'ya humai'ya Anumaya Kotife 'Kava yagailato.' hu'ya hugahae." huno hie.

²⁴ Hige'ya agai'aenema tokae'ya nemaiya anaga'mo'ya ani kehena amama'yoa aiyanaagi Yisasi'a nago'ene mage huno hie "Nafa'ne'nimogatama vea'mo'ya kasageke humai'ya humai'ya Anumaya Kotifena 'Kava

yagailato.' hu'ya hugahae.

²⁵ Nagola pulumaka kana afumo agia kemolumo'a neka'yamo kapima haifalesiana afa'a yo'yo huno haifalegahianagi muki'a mone afeno'yama'a hanesia kanomo'a Anumaya Kotifena 'Kava yagainato.' huno kasageke huno haifalegahie." huno humaine.

²⁶ Haviya anaga'mo'ya tusi'a amama'yo aige'ya mage hu'ya hae "Na'ama humainesiana hana vea'mogami amaku amame Anumaya Koti'a aligatigahie?" hu'ya hae.

²⁷ Hageno Yisasi'a amakeke huno amakemaineno mage huno hie "Vea'mogamina tokiya'amia omaleneanagi'ya ohugahayanagi Anumaya Koti'a muki'a kava hisia tokiya'a haneanagino afa'a aligatigahie." huno hie.

²⁸ Higeno Pita'a mage huno hie "Havio tagaya muki'a yatia ataleteta kagai kakavela ne'one." huno hie.

²⁹⁻³⁰ Higeno Yisasi'a mage huno hapaiye "Tamage hu'na tamahanepauve muki'a vea'mo'ya nagaifema hu'ya nagai kanale mono kema vea'mogamima mo hamapaigahena no'amiene nepu'amiene amasa'amiene ita'amiene ne'amafa'ene nafa'ne'-amiene mopa'amiene amatale'ya visageno'a Anumaya Koti'a mopale mainaya kanafima atalenesaya no'amiene nepu'amiene amasa'amiene ita'amiene nafa'ne'amiene mopa'amiene nago'ene nago'ene ohavunama'a ya alite'ya huhaviyama humatesaya ya'ene alite'yagi

haenaga¹a maige maige hisaya hamaimula amamigahie.

³¹ Meni kanafima hagote¹ya mainaya veala ani kanafina haenagalafa maigahayanagi meni kanafima haenagalafa mainaya veala ani kanafina hagote¹ya maigahae.” huno humane.

Yisasi¹a tagufa kanale “Falimainesufitila hetigahue.” huno humane.

³² Yelusalemu haigahena katega ne¹u¹ya Yisasi¹a hagoteno vige¹ya agai¹aenema tokae¹ya nemaiya anaga¹mo¹ya amama¹yo ai¹ya ne¹vage¹ya amakave vava vea¹mo¹ya koli nehageno Yisasi¹a eteno nago¹ene tuelufu¹a (12) anaga¹amogamina amahaote amavaleno momateneno haenagama agaila hutesaya yafena hamanepaiye.

³³ Mage huno hie “Haviho tagaya Yelusalemu haisunage¹ya ikapinagati emainoa kanoa vava¹mo natenea kanomonia natafa huteno mono note kava vava¹mogami amayapi¹ene kahegi kema havilinaya anaga¹mogami amayapi¹ene natesige¹ya nagai¹fena ‘Afa¹a falisie.’ hu¹ya Yuta vea omainaya vava¹mogami amayapi navale¹ya nategahae.

³⁴ Natesage¹ya nagaye hisifa ke hunate¹ya amavetu¹na henenate¹ya hegi ka¹yoteti haifu namite¹ya nahaesage¹na yafaga yosale faligahue. Falisuge¹ya hevainatetesage¹na tole yupa komufinaga maite¹na tagufa (3) kanale falimainesufitila hetigahue.” huno hie.

Yemesigani Yonigania “Ala kava kanolata maisu'e.” hu'ana humaina'e.

³⁵ Sepeti nafa'nelatana Yemesi'ene Yoni'ene Yisasite e'ana mage hu'ana haviga'e “Hulavenelina kanomogae nago yafe kahavigesu'ageka ani yana hula'ato.” hu'ana haviga'e.

³⁶ Ha'ageno Yisasi'a mage huno hanavige “Na'a hulanatesue?” huno hie.

³⁷ Hige'ana mage hu'ana ha'e “Tokiya hale yaka'afima umaisanageta'a ta'agaya kavate mainesu'ageka 'Nago'moga tamaga nayatega maiyo.' huteka 'Nago'moga hauga nayatega maiyo.' huka hula'ato.” hu'ana havigemaina'e.

³⁸ Haviga'anagi Yisasi'a mage huno hanapaiye “Nahaviga'a yafena ohavina'e. Falisua yana satu'age humainea ti kana humainea ti hanea ke'ayopitila negahugi tanakaya na'ale'asino ona'ale'asine? Nagaila falenatesaya yamo'a, nagatama aisia yatetila tanakaila ani yateti falelanatesagetanahena afa'a aliga'o?” huno hie.

³⁹ Hige'ana “E, tokiyati'a haneanagita'a ani'a hugahu'e.” hu'ana ha'ageno Yisasi'a mage huno hie “Tamage satu'age humainea tina nega'anagi falenatesaya yamo'a nagatama aisia yateti falelanategahae.

⁴⁰ Falelanategahayanagi ala vaya'ma mainalega tamaga nayategaene hauga nayategaenena siale maisaya yana nagai yana omalegi Anumaya Koti'a agai'a ani yana ago

nago¹a vayafe huno talo tala huno ali fatago humatene.” huno hie.

⁴¹ Hige¹ya teni¹a (10) anaga¹mo¹ya ani kea havite¹ya Yemesigani Yoniganina amaipa havi¹ya haviya hunatenae.

⁴² Yisasi¹a “Nagaitega eho.” huno hige¹ya ageno mage huno hie “Ma mopafi ala kava vaya¹mo¹ya ‘Tusi¹a ala vaya mainone.’ hu¹ya Yuta vea omainaya veafe ke amamaki¹ya ali¹ya ke humate¹ya kava vaya¹mo nehaya avamete kava nehae.

⁴³ Na¹a nehayanagi tamakaya ani¹a kavala ohiho. Tamakaipima ‘Nagi hanea kanoma maigahue.’ huno hisia kanomo¹a ali¹ya kanotami maino.

⁴⁴ ‘Uhagote¹na maigahue.’ huno hisia kanomo¹a miya o¹ali ali¹ya kanotami maino.

⁴⁵ Nagaya ikapinagati emainoa kanoa vaya¹mo natenea kanomo¹na vea¹mo¹ya naya hu¹ya ali kanale hunatesaya yafene hu¹na omenogi nagaya amaya hu¹na ali¹ya kano¹ami maisuafene hu¹na emaine¹na muki¹a vea¹mo¹ya kefo yama nehaya yamo aigagimatenea yapiti alikalu hematesuafe miya atalesue hu¹na faligahe emainoe.”

Yisasi¹a nagola aulaga asu humainea kanoa alino kanale hutene.

⁴⁶ Yisasi¹a agai¹aenema tokae¹ya nemaiya anaga¹ene kasago¹ya vea¹nene Yeliko kumate uva¹yi hute¹ya ani kumala mogase¹ya ugahe nehageno nagola aulaga asu humainea kanomo agia Patimeusi¹a Timeusi nafa¹negino ka

agegayale mopale maineno monehe auka'ya huge huge huno maine.

⁴⁷ “Nasaleti Yisasi'a ago ne'e” hu'ya haya kea haviteno ke huno mage huno hie “Yisasigae, Tevitina aginagomogae nagaila kahau hunato.” huno hie.

⁴⁸ Hige'ya kasago'ya vea'mo'ya kemaki'ya “Ke ohuka maiyo.” hu'ya hayanagi nago'ene ke huno “Tevitina aginagomogae nagaila kahau hunato.” huno hie.

⁴⁹ Higeno Yisasi'a anile mo hetimaineno mage huno hie “Hapaigeno eno.” huno hige'ya ani kanohe ke hu'ya mage hu'ya hae “Kagu'a ali lokiya vaika aup'a hetio. Kagaife ke nehie.” hu'ya hae.

⁵⁰ Hageno aya'aya yasi kena'a asagi ne'ataleteno aup'a hetino Yisasite vie.

⁵¹ Vigeno Yisasi'a mage huno hie “Na'a hugatesue?” huno higeno aulagama asu humai kanomo'a mage huno hie “Humavenelina kanomogae naulaga agesue hu'na nehue.” huno hie.

⁵² Higeno Yisasi'a mage huno hapaiye “Afa'a vuo nagaifema havika kagupi maleka kametitima hana yateti ago ali'na kanale hugatoe.” huno higeno aup'a aulagamo'a kanale higeno Yisasi akave umaine.

11

Yisasi'a Yelusalemu kumapina sauve kana huno uva'yi humaine.

1-2 Yelusalemua aupate hanege¹ya tole osi kumatalana Petafasiene Petaniene hanea kumate umainae. Ani kumatalana Olivi yosa hanea ago¹yamo agegayalega hane. Anile maine¹ya Yisasi¹a tole agai¹aenema tokae¹ana nemai¹a kanolatana hunateno mage huno hanapaiye “Atu kumate utetana atupa note hosi kana afumo agia tokimo nafa¹nea ayetenayanagitana agega¹e. Ani tokimo nafa¹nea vayala o¹amavalenea tokie. Kalu hetana avaletana male e¹o.

³ Ne¹e¹age¹ya nago¹a vaya¹mo¹ya ‘Na¹a hige¹tana na¹a kavala neha¹e?’ hu¹ya hisagetanahena mage hutana hi¹o ‘Kava kanotimo¹a nago ali¹ya aligahe hige¹tana ne¹o¹anagino ali¹yama¹a aliteno aup¹a eteno tamamigahie.’ hutana hamapai¹o.” huno hie.

⁴ Hige¹ana ani kanolatana u¹ana ani tokimo nafa¹nea no fiate ayetageno ka agegayale hetino mainege¹ana mogefalote hute¹ana nofila alikalu hemaina¹e.

⁵ Neha¹age¹ya nago¹a anile hetimainaya vaya¹mo¹ya mage hu¹ya hae “Na¹a hige¹tana tokimo nafa¹nea kalu neha¹e?” hu¹ya hae.

⁶ Hage¹ana Yisasi¹ma “Nage hutana hi¹o.” huno¹ma hia kea hamapai¹age¹ya ani vaya¹mo¹ya “Afa¹a tokia avaletana vi¹o.” hu¹ya hae.

⁷ Hage¹ana ani tokimo nafa¹nea Yisasite avale¹ana eva¹yi hute¹ana kena¹ania anaugafaleti hate¹ana ani afumo agupile yakaimala¹ageno Yisasi¹a anile haino maine.

⁸ Maige¹ya muki¹a veapiti nago¹amo¹ya amau-

gafaleti kena'amia hate'ya via katela yakaige'ya nago'amo'ya haisa hanete hanete yosayaga ko-fanafa hu'ya katela yakaimalageno Yisasi'a ani kate afumo agupifina maiteno umaine.

⁹ Hagote'ya vava vea'mo'yaene haenagama vava vea'mo'yaene ala kenake kefiti mage hu'ya hae “Alamogae taugafa aligatisana kanoa kanale'ya huka ne'ane. Anumayamo ali'ya alisana yafe hugategeka emainana kanomoga Anumaya Koti'a kanale manu kamino kaya humaine.

¹⁰ Taginagomo'a Teviti'e nayona kava huno'ma yagaimainea avamete kavala eteno ani'a huno falote hugahie. Ani yafena muse higetao. Ana-finaga Anumaya Koti'a taugafa aligatisia kanohe muse hisune.” hu'ya humainae.

¹¹ Yisasi'a Yelusalemu uva'yi huteno ala mono nopi umaineno muki'a mono nopima hanea yana ako huno ageliteno huno ageteno ne'ataleno hani kisia avamete higeno ataleno tuelufu'a (12) anaga'aene Petaniga vae.

Yisasi'a fiki yosahe “Alaga'a o'ayo.” huno hutene.

¹² Faete'ya kotige'ya Petania atale'ya ne'vageno Yisasina agatemaine.

¹³ Agategeno nagola haisa afa'a hanea fiki yosamo'a alu'ale hanegeno ageteno alaga'ahe mogegahe ani yosamo aepale uno mogeana alaga'a omalegeno haisayaga'age hane. Ani fiki yosamo'a alaga'ama ne'ayea kanamo'a yaufa falote ohune.

14 Mogeteno Yisasi'a ani yosahena mage huno hie “Namo yosa hetika maiyo. Agola kagai kaugafa vea'mo'ya nago'ene onegahae.” huno huhaviya hutege'ya agai'aenema tokae'ya ne-maiya anaga'mo'ya ani kea havimainae.

Yisasi'a ala mono nopi mone ali'ya ne'aliya vea'ne amanatitalene.

15 Yelusalemu eva'yi hute'ya Yisasi'a ala mono nopi haino mone ali'ya ne'aliya vea'nene afa'a miyama nehaya vea'nene “Maihaleho.” huno amanatine'ataleteno nago'a vea'mo'ya alu kotegama nehanea monea ne'ali'ya ani kotegama nehanea monea ne'amamiya vea'mogami folomoa alitalegeno aige helafige higeno kugofa kana namama miya nehaya vea'mogami sipa'amia ani'a huno alitalegeno aihelafilavimaine.

16 Afenoma alilite'ya nehaya veafena mage hie “Ala mono no kumapina afenona alitama ute ete ohiho.” huno hie.

17 Huteno mage huno hamapaiye “Anumaya Koti'ma humainea kemo'a auta'mafina mage huno kaemaleneane

'Nagai nona muki'a kotega vea'mo'ya Anumaya
Koti agi aye'ya havigesaya no hane.' huno
kaemaleneanagi

tamakaya musufa yama nehaya vea'mogami nomo avamete kava hutama falakitama musufa ya hugahe ma mono nopina emainae.” huno nehie.

18 Hige'ya mono note kava vaya'mo'yaene ka-hegi kema havilinaya anaga'mo'yaene Yisasi'ma

hia ke havite'ya muki vea'mo'ya Yisasi'ma hamapaiya kema havite'ya amama'yoma aiya yafe koli hute'ya “Hana'a huta haesune.” hu'ya humainae.

¹⁹ Hayanagi Yisasi'a anaga'amo'yaene hani kige'ya Yelusalemua atale'ya umainae.

Tamage huno ametiti huteno nunamu hisia vea'mo'a havigesia yana aligahie

²⁰ Yisasi'a faeteno natena agai'aenema tokae'ya nemaiya anaga'aene kate vayana anima alaga o'ayenea fiki yosa mogayana hafu'yayagafiti amagino haisamo'a amagiteno fayotemaine.

²¹ Yisasi'a ani yosahema humainea kekena Pita agesamo'a hao higeno haviteno Yisasife mage huno hie “Humavenelina kanomogae ago fiki yosama huhaviya hutana yosamo'a ago fa'yotemaine.” huno hie.

²²⁻²³ Higeno Yisasi'a mage huno hamapaiye “Anumaya Kotifena mage hutama hiho ‘Kagaya muki'a yana hate'asine.’ hutama tamakupi maletama tamametiti hisayana tamage hu'na tamahanepauve Anumaya Kotifena tole lamakesa ohavitama ‘Havigesua yana falote hugahie.’ hutamama hisagenofena ani yamo'a falote hugahie. Ani kava'ma hisia kanomo'a ma ago'yahena ‘Ma ago'yamoga kofa hulavika ala tikotumo amu'nopi ufaemaiyo.’ huno hapaisigenofena akave maleno ani'a hugahie.

²⁴ Ani yafe mage hu'na tamahanepauve muki'a yafena Anumaya Kotitega havigesayana 'Anumaya Koti'a kanale'ya huno lamigahie.' hutama tamakesa havisagenofena afa'a tamamigahie.

²⁵⁻²⁶ Tamakaya hetitama Anumaya Kotitegama ke hutama havigegahena hagotetama kefo yama hulamatenesaya veafena aige'amatetama kefo ya'amia atalematesagenofena ikapinaga mainea Nelamafa'a kefo yatamia aigetamateno atalelamategahie.

Yisasifena "Himamu yaka'a ta kamine?" hu'ya havigae.

²⁷ Yelusalemu alehate eva'yi hayana Yisasi'a ala mono no kumapi ute ete nehige'ya mono note kava vaya'mo'lyaene Yuta vayatamaene kahegi kema havilinaya anaga'ene agaitega eva'yi hae.

²⁸ Eva'yi hute'ya mage hu'ya hae "Hana augafa ala kanomo hugategeka mani kavala me nehane? Himamu yaka'a ta kamine?" hu'ya havigae.

²⁹ Hageno Yisasi'a kenona'amia mage huno hie "Nagaya hagote'na nago yafena tamahavigesugetama nahapaisage'na nagaya ani yama talo nehua himamu'nima hanea navagea tamahapaigahue.

³⁰ Yoni'a tima fale ne'amatea yana Anumaya Koti hutegeni ani kavala me nehifi afa vaya'mo'lya hutageno lina falene'amate? Tamakaya hufalote hutama nahapaiho." huno hamavige.

³¹ Hige'ya "Na'a ma'a hugahune." hu'ya mohu mehu hute'ya mage hae "Anumaya Koti

hutegenō emaine.” huta hisunageno¹a Yisasi¹a “Na¹a higetama agai kea havitama tamakupina nomalae?” huno hugahie.

³² Hugahianagita muki¹a vea¹mo¹ya Yonifena “Anumaya Koti aune kano maine.” hu¹ya tokiya¹age kema nehaya yafe tagaya “Afa vaya¹mo¹ya hutageno emaine.” huta hisunagenofena kelamakigahie huta koli nehune.” hu¹ya hae.

³³ Kolia nehu¹ya Yisasifena mage hu¹ya hae “Tagaya ohavinonanagita hufalote huta kaha¹opaigahune.” hu¹ya hageno Yisasi¹a mage huno hie “Naha¹opaisayana nagayaenena ani¹a hu¹na hufalote hu¹na ani yama taloma nehua himamu¹nima hanea navagea tamaha¹opaigahue.” huno humaine.

12

Havi vaya¹mo¹ya vaini hoyale¹ma yagaimainaya vayate avame kea humaine.*

¹ Yisasi¹a aepa heno avame kea mage huno hamapaiye nago kanomo¹a vaini* nofi alaga hoya humaleteno kegi¹ya hugove humaleneno ani alagayagamo tima¹a ayelatisigeno tima¹amo¹a tavino umaisia komua kafiteno yagai¹yama maisaya nona anafi kimaleteno alu vayafe ke huno “Etama hoya¹nile me yagaitama maineho. Ani nofi¹mo alagafitila aye fako hutama nago¹a aliho.” huno humateteno alu kotega umaine.

² Umaineno fuma nelea kanafina ani hoya-mona nefa¹a nagola ali¹ya kanoa hutegenō ani

vaini hoyale'ma ne'yagaiya vayatega alaga ali-gahe umaine.

³ Vigel'ya hoyale'ma ne'yagaiya vaya'mo'ya ani ali'ya kano'amona atafa hu'ya ka'yo amite'ya mage hae “Okamigahunagi kagaya eteka vuo.” hu'ya hageno eteno umaine.

⁴ Eteno vigeno hoyamona nefa'a alu ali'ya kano'a hutegenoviana ani'a hu'ya atafa hu'ya anu alite'ya tusi'a agaye hisifa kava hutena.

⁵ Hutageno vigeno eteno alu ali'ya kano'a hutegenoviana hoyafi viana atafa hu'ya hayageno falimaine. Falitegeno hoyamona nefa'a kasago'ya ali'ya vaya'yaga humatege'ya vage'ya nago'a ali'ya vayala amatafa hu'ya nehamae'ya nago'a kuyafa ne'amatale'ya nago'a tefa hamae falimaine.

⁶ Muki'a vageno hau ayamopafima nehaiya nafa'ne'a agai'age maigeno nefa'a mage huno hie “Nafa'ne'nimo kea havigahae.” huteno hutegenohaenagalafa ani hoyalega umaine.

⁷ Vigel'ya ani hoyafima yagaimainaya vaya'mo'ya mage hu'ya hae “Mamona mani hoyamona nefa nafa'ne. Nefa'ma falisigenofena mani nafa'nemo'a hoyo'a aligahianagita ago haetao. Haesunageno falisigeta mani hoyo tagai ya hapaegahie.” hu'ya hae.

⁸ Hute'ya atafa hu'ya hayageno falige'ya augafa'a ali'ya hoyafinagati ai halatu hu'ya malaga haga'yu hutalena.

⁹ Huteno Yisasi'a mage huno hamavige “Na'a hayanagino hoyamona nefa'a hana'a humate-

gahie? Eno hoya'afima yagaimainaya vayala tavata me hamaesige'ya faligahae. Fali ha'no hisageno alu vayafe “Tamakaya hoyalela kava me yagaiho.” huno humategahie.” huno hie.

¹⁰ Nago'ene Yisasi'a mage huno hie “Manima Anumaya Koti avopima hanea kea ago hapalitamama havimainao? Mage huno humaineane ‘Vaya'mo'ya yafa noma kiyana nago yafafena ‘Haviya humaine.’ hu'ya atalayanagi ani yafamo'a haenaga'a ‘Tusi'a kanale yafanagino amakaseno haimainea yafane.’ hu'ya nomo ayetagenale malenae.

¹¹ Anumayamo'a ani'a humaineaganigita ne'ageta tusi'a kanale ya hane huta nehune.’ hu'ya kae-malenayane.” huno hie.

¹² Yisasi'a mani kea hige'ya mono note kava vaya'mo'ya “Mani avame kema hiana tagaife nehie.” hu'ya amakesa havite'ya mage hae “Avaleta kina nopi ategahune.” hu'ya hayanagi alitalu humainaya veafe koli hute'ya Yisasina atale'ya umainae.

Sisana takisi monea amisao ifi o'amigahae?

¹³ Nago'a Falasia vaya'ene nago'a Heloti vaya'ene humatage'ya Yisasi'ma havigaya keleti ayevataga hu'ya atafa hu'ya haegahe Yisasi mainelega umainae.

¹⁴ Umaine'ya mage hu'ya havigae “Humavenelina kanomogae tagaya ago havunana kagaya tamage'age kano mainane. Amakima hanea vaya'ene amakima omale vaya'enefena nagoke kateke'ya havi ne'amamika kelamage

nehuka Anumaya Koti kea tahanepainane. Takisi monema ataleyatela Sisa'a kava kanomotega kanale atalesuno ifi o'atalesune? hu'ya havigae.

¹⁵ Hageno Yisasi'a amakupinagama haviya kea ago haviteno “Vagala vaya mainetama amegati ke nehae. Na'a higetama nagaila ayenavataga hutama natafa hisaya yafena nahavinegae? Nagola alaga monea alitama me namige'na agano.” huno hie.

¹⁶ Hige'ya nagola alaga monea ali'ya memigeno ageteno mage huno hamavige “Mani alaga monelela ta augosaene ta agiene hane?” huno hamavigege'ya “Sisa augosaene agiene hane.” hu'ya hae.

¹⁷ Hageno Yisasi'a mage hie “Sisana agai'a yana agaila amiho. Nagi Anumaya Kotina agai'a yana agaila amiho.” huno hige'ya ani kekena amama'yo aimaine.

Satusi vaya'mo'ya falimainesafiti hetisaya yafe Yisasina havigeminae.

¹⁸ Nago'a Satusi vaya'mo'ya* Yisasitega eminae. Ani vaya'mo'ya mage nehaya vayale “Falimainaya vayala ete'ya heotigahae.” hu'ya nehaya vayale.

¹⁹ Vayalegi'ya Yisasina me havige'ya mage hu'ya hae “Humavenelina kanomogae Mosese'a tagaifena mage huno kaemaleneane 'Nago kanomona nepu'amo'a nafa'ne'a o'ate kanoa a'ama ataleno falinageno'a agana'amo'a ani aala aliteneno ago'ma falimainea kanomofe anona'a nafa'ne atesie.' huno kaemaleneane.

20 Nago kanafina seveni'a (7) konaga mainayanagino nepu'amimo'a aala aliteneanagino nafa'nea o'ate kano maineno falimaine.

21 Falitegeno anile agana'amo'a ani aala aliteana nafa'nea ani'a huno o'atenea kano falitegeno anile agana'amo'a ani'a humaine.

22 Muki'a seveni'a (7) konagamo'ya aliteme aliteme ayana nafa'nea o'ate'ya fali ha'no hageno haenagalafa ani aala falimaine.

23 Seveni'a (7) konagamo'ya ani aala alite-nayanagi falimainesafiti'ma hetisaya kanafina hana kanomo ani aala aligahie?" hu'ya havigae.

24 Havigageno Yisasi'a mage huno hamapaiye "Anumaya Koti kefima kaemalenea kene tokiya yama'aenefena havilama hutama ohaviya yafe tamakaya havi tamakesage'ya nehaviye.

25 Vea'ma falimainesafiti hetisaya kanafina ensole vaya kana hu'ya vemo'ya aala o'aligahae. A'mo'yaenena vea o'aligahae.

26 Falimainaya vea'ma ete'ya hetisaya yafe nahavingao? Mosese kaemalenea avopima oha-palinao? Nagola osi yosale'ma ala ata anefela leanagi ani osi yosa otene." huno kaemalenea kea ohavinao?

Anumaya Koti'a ani kanafina Mosefena mage huno humaineane "Nagaya Apalahamunagi Aisakinagi Yekopugami Anumaya mainoe." huno humaineane.

27 Ani anagala falimainayanagi "Nagaya Anumaya Koti'amimo'na mainoe." huno humainea yafena amaku amamemo'a ofalinegi

afa'a mainaya yafe ani kea humaine. Tamakaya vea'mo'ya he'otigahae hutama nehaya kea havige nehae." huno hamapaimaine.

Anumaya Kotina hagoteno tokiya'age kahegi ke'ae.

28 Nago kanoa kahegi kema havilinea kanomo'a anile eno huge havige haya kea haviana Yisasi'a kanale kema huhaleno hamapaiya kea me haviteno Yisasifena mage huno havige "Anumaya Koti kahegi kefitila hana kemo muki'a kemono agaseno uhagoteno tokiya'age kea hane?" huno havige.

29-30 Havige-geno Yisasi'a mage huno hie "Uhagoteno tokiya'age'ma humainea kemo'a mage huno humaine

'Isaleli vayala* haviho Anumayamo'a tagaiti Anumaya Koti'a agai'age mainegi nago'a Anumaya omaine. Kagaya Anumaya Kotikamofena kahau kayamopafina tokiya'age huno kahaino. Muki'a kagesama havisana ya'ene kagu kamema havisana ya'ene ali'ya ne'alina kayamufaene tokiya'age huka Anumaya Kotina amio.'

31 Anile nago kea mage huno humaineane

'Muki'a vayafena tusiya huno kahau kayamopafi kahaino. Kagaika kaugafahema kahaisia avamete ani'a huno alu vea'mogami amaugafahena kahaino.'

Menima tole kema kahapauva kemo¹a muki¹a Anumaya Koti kahegi kemono ago amakase-mainea ke hane.” huno hie.

³² Higeno ani kahegi kema havilinea kanomo¹a Yisasifena mage huno hie “Humavenelina kanomogae tamage nehane. Nagoke Anumaya Koti mainegi nago¹a Anumaya Koti omaiye.

³³ Omaigi tagaya muki¹a tahau tayamopafi tokiya¹age huno tahaisigeta muki¹a tagesama havisuna ya¹ene tagu tamema havisuna ya¹ene ali¹ya ne¹aluna tayamufaene tokiya¹age huta muki¹a Anumaya Kotina amisune. Amiteta muki¹a veafena tahau tayamopafi tahainageno tagaiti laugafahema tahaisia avamete ani¹a huta alu vea¹mogami amaugafahena tahaisie. Na¹ama hisuna yamo¹a muki¹a alu kavala amakase-maine. Nayona vea¹mo¹ya ‘Anumaya Kotina muse yana ne¹amune.’ hu¹ya nagola sipi sipi he¹ya ne¹ami¹ya nago sipi sipia atafi kae sala¹mana aine¹atale¹ya nehaya yamona menima kahapauva kemo¹a ani kavala ago agasemaine.” huno hie.

³⁴ Yisasi¹a anima huhaleno¹ma hia kea haviteno “Havi¹yama¹aene kano maineafenagino nahapaiye.” huno agesafinaga haviteno kenona¹a mage huno hie “Ani kema hana kemoga aupa¹a Anumaya Kotife ‘Kava yagainato.’ huka hugane.” huno hie. Hige¹ya vaya¹yagamo¹ya havite¹ya koli hu¹ya Yisasina nago¹ene haviokenae.

Yisasi¹a Anumaya Kotima hutenea kanohe

vea'mogami hamavige.

³⁵ Yisasi'a ala mono nopi mo humavenelino mage huno hamavige “Kahegi kema havilinaya anaga'mo'ya na'a hige'ya Kalaisifena, ‘Anumaya Koti'a hutenea kanomofena Tevitina aginagomo'a mopale kano maine?’ hu'ya nehae.” huno hamavige.

³⁶ Hamavinegeno mage hie “Teviti'a Anumaya Kotina Alu Aotage Avamumo hapaiya kea mage huno humaineane ‘Anumaya Koti'a Anumaya-ni'amofena mage huno humaine ‘Tamaga nayatega, ala vaya mainalega hanea siale emainesanage'na kame vayaka'a kaiyafinaga amatesuge'ya kagaife ‘Ago tagasane.’ hu'ya hugahae.’ huno kaemaleneane.

³⁷ Teviti'a Kalaisife ‘Anumayani'a mainane.’ huno humainegi na'a higeno Teviti'a haenagama atesia aginagomofena ‘Anumayani'amoga mainane.’ huno humaineane?” huno hamavige. Hige'ya muki'a alitalu humainaya vea'moya Yisasi kea havite'ya tusi'a muse hae.

Kahegi kema havilinaya anaga'mo'ya kefo ya'ene nehaya vayale.

³⁸ Yisasi'a hamapaiya kefiti mage huno hamapaiye “Kahegi kema havilinaya anagafena ka'yeho. Ani vaya'mo'ya aya'aya kena failiya yafena ‘Nelagafi notagafi?’ hu'yama haya yafena tusiya huno nehamaiye. Vaya atagu nefaya kumapi mo vaiyatete nehu'ya ‘Na'a vaya

mainae.' hu'ya 'Ali falu fala hulatesae.' hu'ya nehae.

³⁹ Mono nopi'ene imule'ene 'Ala vaya'age'ma nemaiya sialeke'ya maigahune.' hu'ya nehae.

⁴⁰ Ani vaya'mo'ya keto a'neyagahena 'Mono nopima atalesaya monea tamiho.' hu'ya nehu'ya no'amifima hanea ya'yaga musufaya hu'ya mone'amia ali ha'no nehaya vayalagi'ya. Vaya'yaga ayemavataga hu'ya 'Kanale vaya mainae.' hu'ya hisae hu'ya aya'aya nunamu nehayane. Ani'lama nehaya vaya'mo'ya havi miyana tusiya huno amaugafa amagata aisia ya'ene aligahae." huno hie.

Mone'a omale a'mo'a Anumaya Kotitega muse yama'a atalene.

⁴¹ Yisasi'a mono nopi mone ne'atalaya kaiyaga maineno monema atalaya veala amakeana mone'amima hanea vea'mo'ya "Monetia Anumaya Kotina amigahune." hu'ya ala mone pokisifina atalene.

⁴² Atalageno nagola mone'a omale keto a'mo'a tole osi haesa monea metalene. Ani haesa yafatalamogania tokaya'ageno'a vani toya kana humaine.

⁴³ Yisasi'a ani yana ageteno agai'aenema tokae'ya nemaiya anagafe ke hige'ya ageno mage huno hamapaiye "Nagaya tamagelafa hu'na tamahanepauve ma ma mone'a omale keto a'mo'a hagote'yama metalaya vea'mogamina amakaseno ala mone metale.

44 Metaleneanagi mone'amima hanea vea'mo'ya ali'yama'a omalenea monegi'ya havigu malenaya monegi'ya afa'a metalayanagi ani a'mo'a muki'a yama'a ali ha'no huno metale. Muki'a kave'lama alino nesia mone'a muki'a alino metale.” huno hie.

13

Yisasi'a “Ala mono nona tagape ailavigahie.” huno humaine.

¹ Yisasi'a ala mono nona ne'ataleno vigeno nagola agai'aenema tokaeno nemaiya kanomo'a mage hie “Hulavenelina kanomogae male ago. Ala yafana kanale yafa'yagaleti kimalenaya kanale no'yaga hanegeka ne'agane.” huno hie.

² Higeno Yisasi'a mage huno hie “Kagaya mani kanale'nale ala no'yaga ne'agano? Ani muki'a yafa'yaga alino lagape aitalessigeno aposilav-isianagi nago yafamo'a nago yafamo agupifina aikalo huno omaigahie.” huno hie.

Yisasi'a “Tusi'a kana yamo falote hugahie.” huno hie.

³ Yisasi'a Olivi yosa hanea ago'yamo agegay-alega haino mopale maineno ageana ala mono nona atu kaiyaga hanegenon ne'agege'ya Pita'ene Yemesi'ene Yoni'ene Etalu'ene Yisasi'ma mainel-ega emainae.

⁴ E'ya Yisasife mage hu'ya havigae “Ani yafa nomo'a tagapema aisia kana na kanafine? Hana augafa tokiya avame yamo ani kanama falote'ma hisia kanafina taveligahie?” hu'ya havigae.

5 Hageno Yisasi'a mage huno hie “Nago'a vaya'mo'ya havigema lamahapaisagetamahena ohavisaya yafe ka'ye ho.

6 Muki'a vaya'mo'ya nagai nagia ne'aye'ya ‘Anumaya Koti'a tamaugafa aligatisuna yafe hu-lategeta ne'one.” hu'yama hisayana kasago'ya vea'ne havige ayemavataga hugahae.

7 “Nago'a kotega kamema nehae.” hu'ya hisagetamaene “Kotamile-gaenema kamema nehae” hu'yama tamahapaisagetamahena kolia ohiho. Ani ya'yagamo'a hagoteno falote hugahianagi ma mopama ha'no hisia kanamo'a yaufa falote ohune.

8 Nago'a vaya'mo'ya alu vaya'lenena kamea hugahae. Ala kotega vaya'ene nago ala kotega vaya'lenena kamea hugahae. Kasago'ya alu kote kotela tusi'a imila aligahie. Alu kote kotela tusi'a kafu nehu'ya amakatesia kanamo'a falote hugahie. Ani ya'yagamo'a afa'a a'nemo'ya nafa'nema ategahema hageno aepa heno amagata ne'aiya avamete kava hugahianagi haenaga'a tusi'a tamagata yamo falote hugahie.

9 Tamakaitamia kava yagailama hiho. Nago'a vea'mo'ya tamakaila tamavale'ya kanisole vayate kaiyekea hulamategahae. Mono nopi tamavale'ya ka'yona mo lamamigahae. Nagai nakave'ma haya yafe tamavale'ya ala kava vayate'ene amakasemainea sauve vayate'ene tamavale'ya hetilamatesage'ya kaiyekea hulamatesagetama nagai kanale mono kea hamapaigahae.

¹⁰ Hamapaigahayanagi hagote¹ya Yisasi kanale mono kea ali¹ya ute ete hu¹ya muki¹a kote vea¹mogamina hamapaitesageno ma mopamo¹a ha¹no hugahie.

¹¹ Tamavale¹yama kaiyeke hulamatesaya kanafina kema hisaya yafena “Na¹ane huta hugahune¹ hutama tamakesa ku¹mo¹a ohutama afa¹a viho. Ani kanafina kanale kema hisaya kea Anumaya Koti¹a tamahapainagetama hugahae. Ani kea tamakai kea omalegi Anumaya Koti Alu Aotage Avamu¹mo¹a huno lamakesa hinagetama hugahae.

¹² Ani kanafina vea¹mo¹ya amakai¹ami nepu¹amimona kame vaya¹amimote amavale¹ya visaya¹amo¹ya ‘Hamaege¹ya faliho.’ hu¹ya hugahae. Nefa¹a nafa¹neyaga¹a ani¹a humategahae. Nafa¹ne¹amimo¹ya ita¹af¹o¹amimo¹ene-na aliyahae hu¹ya kamea humatete¹ya ‘Hamaetama faliho.’ hu¹ya hugahae.

¹³ Nagima ne¹ayaya yafe muki¹a vea¹mo¹ya havi¹ya amaipa kafa helamategahae. Nago¹a vea¹mo¹ya nagai kemona meni kanaleti aepa he¹ya atafa hu¹ya tokiya¹age hume hume ne¹visage¹na Yisasi¹na ete¹nama esua kanafina nagai kema atafa hulinesaya vea¹mogamina Anumaya Koti¹a amaku amamena aligatigahie.

Tusi¹a havi yatafa falote hugahie.

¹⁴ Yisasi¹a nago¹ene mage huno hie tusi¹a havi yana ma mopa alino hagagitalialesia yana alu

aotage yapi hetimainesigetama agegahae. An-
 ima tamama'yoma aisia yama agenuta-mahena
 Yutia mainaya vea'mogatama tamaiyayetama
 ago'yalega viho. Ani Yisasi'ma humainea kema
 hapalitama havisamogatama havilama hutama
 haviho.

¹⁵ Nagi nago kanomo'a nogatofule'ma haino
 maineno ani kema havinunofena tavino
 noma'afinagati haifaleno nago'a yana o'alino.
 Afa'a aiyayeno vino.

¹⁶ Nago'a vea'mo'ya hoyafinagama maine-
 saletila kena'amima aligahena notega ete'ya
 o'viho.

¹⁷ Avo'nio ani kanafina tusi'a havi yamo falote
 hugahie. Amaipaene a'nene nute anilinesia
 nafa'nemogami ita'amimo'yaenefena tusi'a na-
 hau nehie.

¹⁸ Anumaya Kotitega nunamuna mage hutama
 havigehe "Ani havi yamo'a tani ko'ma ikate tisia
 kanafina falote ohisie.' hutama havigehe.

¹⁹ Ani kanafina tusi'a kana ya falote hugahie.
 Ehe'ma Anumaya Koti'a ma mopama talo hu-
 malenea kanafi'ene meni kanafi'enena ani'a ala
 kana yana falote ohuneanagi tusi'a ala kana
 yamo'a nago'ene haenaga'a ani'a huno falote
 ohugahie.

²⁰ Anumaya Koti'a ani havi kanama alino aupa
 ohile'asina muki'a vea'mo'ya falile'asinagi Anu-
 maya Koti'a haigeno'ma hapalimatenea veafe
 agha havino amaugafa aligatisia yafe ani kana'a
 alino aupa hugahie.

²¹ Ani kanafina nago'a vea'mo'ya mage huga-

hae “Anumaya Koti¹ma taugafa aligatigahie huno hutenea kanoa ma mainegi ageho. Atu mainegi ageho.” hu¹ya hisagetamahena “Tamage nehae.” hutama havitama tamametitia ohiho.

²² Ani kanafina nago¹a havige¹age amaune vaya¹ene “Nagaya Anumaya Koti¹ma tamaugafa aligatigahie huno hunatenea kano mainoe.” huno havige hisia kanoene eva¹yi hu¹ya vea¹mogamina ayemavataga hugahe tokiya¹age avame yana hugahayanagi Anumaya Koti¹a ha¹ye huno hapalimatenea vea¹mo¹ya ohavigahae.

²³ Ohavigahagi falote ohunaya kanafina ago tamahapaimainogi ka¹yetama maiho.

Haenaga¹a Ikapinagati emainea kanoa vaya¹mo atenea nafa¹nea egahie.

²⁴ Ani havi kanamo¹a ha¹no hutesigeno yagemo¹a hanima¹age hinageno ikamo¹a aivasa ohugahie.

²⁵ Ka¹nefi¹mo¹ya ikatetila atafailavigahie. Ikate¹ma hanea ya¹yagamo¹ya kanage kanage huno alu kate kate vaiyegahie.

²⁶ Muki¹a ani yamo¹a falote hutesige¹na ikapinagati emainoa kanoa vaya¹mo natenea kanomo¹na ikapinagatila siate elavisuge¹ya nagegahae. Tusi¹a tokiya¹niene tusi¹a hale yani¹aene esugetama nagegahae.

²⁷ Nenagesage¹na ensole vaya¹nia humate-suge¹ya yagemo¹ma tavi nefalelegati¹ene eva¹yi nehilegati¹ene aluga aluga haupalegati¹ene muki¹a mopaene mopaene nagai¹ni¹a nahaige¹na

hapalimatenoa vea¹nea aluga aluga muki¹a ma mopamona atupaleti¹ene ikamo atupaleti¹ene amavalesage¹ya melitalu hugahae.

Tamakaya fiki yosale agevame hiho.

²⁸ Yisasi¹a mage huno hie “Fiki yosamo¹a nago avame ya tamaveligahigi ageho. Ani yosamo¹a hagoteno akopapiti¹ma agusasiyeno amu¹ma malesigetamahena ‘Anuna valesia kanamo¹a falote hugahe nehie.’ hutama nehae.

²⁹ Na¹a hugahayanagi manima tamahanepauva kuguva yama agenutamahena “Yisasi¹a esia kanamo¹a ago aupa higeno fiate hetino maineanagino ago egahie.’ hutama tamakesa havigahae.

³⁰ Nagaya tamage hu¹na tamahanepauve meni kanafima mainaya veala ofalinesageno ani yamo¹a falote hugahie.

³¹ Ika¹ene mopaene fanane hugahianagi nagai kemo¹a fanane ohugahie.

Ani yama falote hisia kanahena nago kanomo¹a ohavine.

³² Manima tamahapauva kanama falote hisia kanahena nago kanomo¹a ohavine. Ikapinaga mainaya ensole vaya¹mo¹ya ohavinae. Anumaya Kotina nafa¹ne¹amo¹na ani kanama falote hisia kanahena ohavinoanagi nenafa¹a agai¹age havi-line.

³³ Tamakaya ani kanama falote hisia kanahena ohavinaya yafe tamaula ofaetama tamakaitamile yagaiho.

34 Nago kava kanomo'ma hia kava huno Yisasi'a egahie. Ani kava kanomo'a ali'ya vaya'amofena 'Ma ali'yana alu ali'ya alu ali'yana tamahaote tamahaote yagaitama maiho.' hune'amateno "Fiate'ma mainamoga kagaika'a yagaiyo." hune'ateno ataleno alu kotega umaine.

35 Na'a humaineafe tamakaya ani'a hutama yagaiho. Nomona nefa'ma esia kanahena ohavinae. Une esio? Kege amu'nopi esio? Kokolemo'a age ne'aisigeno esio? Ifi nate esio? Esia kanahena ohavinaya yafe kava yagaitama maiho.

36 Faetama mainesageno havigu aupa'a esigetama tamakaye hu yafenagi ka'yetama maiho.

37 Mani kea tamakaifema hua kea muki'a vea'mogamife nehugi kava yagaitama tokiya'age hutama maiho." huno hamapaiye.

14

Kava vaya'mo'ya Yisasina haesaya ke hu ha'ya kimainae.

1 Ani kanafina tole yupa maitel'ya kafu'ahe kafu'ahe Anumaya Koti'ma amakinagomo amaugafama aligatimainea yafe* alitalu hu'ya hale oki kaihamena nenaya imu kigahe nehage'ya mono note kava vaya'mo'yaene kahegi kema havilinaya anaga'ene Yisasina haesaya kea kesi ako hu'ya atafa hisaya yafe ke huge havige humainae.

2 Mage hu'ya hae "Muki'a veala imule'ma alitalu hu'ya maisafima Yisasina atafama

hisunage¹ya muki¹a vea¹mo¹ya agete¹ya ke hu¹ya atile male hu¹ya tu hugahae.” hu¹ya hae.

Nago a¹mo¹a Yisasina anupi masave takino faletene.

³ Yisasi¹a Petani umaineno nayona fugitaya agemainea kanomo agia Saimoni¹e kanomo nopi umaine. Mopale umaineno kave nenegeni nago a¹mo¹a anile eno mana¹age masavena havatema yafa ke¹ayola alilino emaine. Ani ke¹ayopina nagola tusi¹a monele hanea masavena mana¹age tina hane. Ani limo agia natie. Ani ke¹ayo¹ma taloma hia yafamo agia alapasata yafane. Ani a¹mo¹a masave ke¹ayola alino aitagino Yisasi anupi takino faletene.

⁴ Faletege¹ya nago¹a anile mainaya vaya¹mo¹ya agete¹ya ke vai¹ya mohu mehu nehu¹ya mage hu¹ya hae “Na¹a higeno mani a¹mo¹a mana¹age masavena afa¹a ne¹atale?”

⁵ Nago kanomo¹ma miya hile¹asina tali hataleti kina (K300) alute¹asine. Aliteta ani masavete monea alita afeno¹amima omalenea vea¹nea amamute¹asine.” hu¹ya ani a¹mofena “Kefo kava talo hane.” hu¹ya kemakimainae.

⁶ Ke ne¹amakigeno Yisasi¹a mage huno hie “Agaila afa¹a ataleho. Na¹a higetama kea ne¹amakiye? Ani a¹mona aipamo¹a haviya hisia kava nehagi nagaila tusi¹a kanale kava hunenate.

⁷ Afeno¹amima omalenea vea¹mo¹ya muki¹a kanafina tamakai¹ene maigahayanagitama amaya hisaya tamakesama havisayana amaya

hugahayanagi nagaya tamakai'enena muki'a kanafina omaigahue.

⁸ Ani a'mo'a amuko'a hanegeni ani kavala hagoteno afa'a ofali'na mainogeno masavema fale'ya hevainatesaya masavena agola fale nenate.

⁹ Tamage hu'na tamahanepauve muki'a ma mopafi veapima Yisasifena kanale mono kema hamapaisayana ani a'mo'ma hia kavafe'enena hamapaisage'ya muki'a vea'mo'ya agaife amakesa havi havi hu'ya maigahae." huno hie.

Yutasi'a hulamake huno kava vayafe "Yisasina avale'na tamamigahue." huno hamapaimaine.

¹⁰ Ani kanafina Yutasi Isakalioti'a tuelfufu'a (12) anaga'aene nemaiya kanomo'a via'amo Yisasina agesi huno momavalesige'ya metafa hisaya yafe mono note kava vayatega umaine.

¹¹ Via'amo mo hamapaige'ya ani kea havite'ya tusi'a muse hute'ya 'Mone kamigahune.' hu'ya hapaitageno Yutasi'a vava kuluta o'ai yate kesi kateti momavaleno esige'ya Yisasina haesaya kafe atiyemaine.

Yisasi'a agai'aenema tokae'ya nemaiya anaga'aene kavala nemainae.

¹² Hale oki kaihame kana maya nenaya kanamo'a ehe kanale Anumaya Koti'a Yuta vava amaugafama aligatimainea kanahe amakesa nehaviya imuma kigahena sipi sipi he'ya ki'ya nenaya kanamo'a falote hige'ya Yisasi'ene tokae'ya nemaiya anaga'mo'ya Yisasina mage

hu'ya havigae “Hanatega kahaisia kumatela Anumaya Koti'a amaugafama aligatimainea kanahe kagesa havisana kavela mo lalo tala hisune?” hu'ya hae.

¹³ Hageno Yisasi'a tole kanolatana hunateno mage huno hanapaiye “Ala kumate ne'vi'ageno ti ke'ayo'ma alino esia kanoene fotu hutetana akave vi'o.

¹⁴ Akave ne'vi'ageno haino mo falesia nopi haitana ani nomona nefafe mage hutana havige'o 'Hulavenelia kanomo'a mage hie 'Hanate ayenalagimalenana nona hane? Yoka namisanage'na nagai'ene tokae'ya nemaiya anaga'niene Anumaya Koti'a amaugafama aligatimainea kanahe tagesa havisuna kavela nesune?' huno hie.' hutana havige'o.

¹⁵ Hisa'ageno'a folamo huno anale kimalenea nona ago alino hilato humaleneanagino ala nona tanavelisigetana kavetia talo tala hi'o.” huno hanapaiye.

¹⁶ Hige'ana ala kumate va'ana Yisasi'ma hia kemo'a muki'a falote hige'ana agete'ana Anumaya Koti'a amaugafa aligatimainea kanahe amakesa havi havi hisaya kavela talo tala humaina'e.

¹⁷ Talo humalena'age'ya yagemo'ma tavi faleama'a Yisasi'a tuelufu'a (12) anaga'amo'yaene emainae.

¹⁸ Mopale emaine'ya kavela nenageno Yisasi'a mage huno hie “Tamage hu'na tamahanepauve nagai'enema kave'ma nenaya anaga'mogatama tamakaipiti kesi nahaesaya yatela nago

kanomo¹a vaine¹aye.” huno hie.

¹⁹ Hige¹ya ani anaga¹mo¹ya amaipa haviya hute¹ya agaifena amahaote amahaote mage hu¹ya hae “Nagaife nehano?” hige¹ya “Nagaife nehano?” hige¹ya hu¹ya havigae.

²⁰ Havigageno Yisasi¹a mage huno hie “Tamakaya tuelufu¹a (12) anaga¹nimogatama tamakaipiti nagoke¹moga kesi nahaesaya katela vaine¹ayane. Ani kanomo¹a nagai¹ene nagoke yopafiti kaihame kana maya ali vayagofino nene.

²¹ Nagaya ikapinagati emainoa kanoa vaya¹mo natenea nafa¹nemonihena Anumaya Koti auta¹mafima kaemalenaya avamete kava hugahuanagi vaya¹mo¹ya havisagi huno nagesi hunatesia kanomofena ‘Avo¹nio nahau hanagi kagaya maiga¹yeka mainekao.’ hu¹na nehue. Ani kanomoga itakamo¹a okatenele¹asina tusi¹a kanale kava hile¹asine.” huno hie.

Yisasi¹a kaihame kana mayaene nofi alagamo ti¹ene amamine.

²² Ani kavela nenageno Yisasi¹a kaihame kana maya alino nunamu huteno muse huno havigeno kolite kolite huno ne¹amamino mage huno hie “Aliho. Mamona nagai¹ni naugafae.” huno hie.

²³ Nagola vaini nofi alagamo ti* hanea ke¹ayola aliteno nunamu huno muse huno havigeno alino amamite amamite hige¹ya nemainae.

²⁴ Nenageno Yisasi¹a mage huno hie “Mamona nagai¹ni kolane. Vaya¹mo¹ya nahaesage¹na falisugeno kolani¹amo¹a takilavino muki¹a veafene huno takilavisia yafe Anumaya Koti¹a hulokiya

vaino alino halegafilamatenea kemo* aepamo¹a alino fatago hugahie.

²⁵ Tamage hu¹na tamahanepauve menia nagaya vaini nofi alagamo tima¹a* nago¹ene onegahuanagi¹na Anumaya Koti¹ma kava yagaimainea kumate umaine¹na haegafa nofi alagamo tina* ete¹na negahue.” huno hie.

²⁶ Hige¹ya yageamea nagola hute¹ya Olivi yosa hanea ago¹yafi haimainae.

Yisasi¹a Pitafe “Kakave¹no hunategane.” huno hie.

²⁷ Yisasi¹a mage huno hamapaiye “Tamakaya muki¹amogatama nagaife havitama tamakupi maletama tamametiti nehaya yana ataletama asaga hulavisagi nayona ani yafe kaemaleneane ‘Nagaya sipi sipi kava kanoa haesuge¹ya sipi sipiyaga atagufe¹ya falegahae.’ huno kaemaleneane.

²⁸ Kaemaleneanagi falimainesufiti Anumaya Koti¹a alino hetinatesige¹na Kalili uhagotelamate¹na visugetama nakave egahae.” huno hie.

²⁹ Higeno Pita¹a kenona¹a mage huno hie “Muki¹a anagala kagaifema havi¹ya amakupi male¹ya amametiti nehaya yama atale¹ya falesage¹nahena nagaya ani¹a ohugahue.” huno hie.

³⁰ Higeno Yisasi¹a mage huno hie “Tamage hu¹na kahanepauve meni kegela kokolemo¹a tole kanale agea o¹ainesigeka kagaya tagufa (3) kanale mage hugane ‘Nagaya o¹agenoa kanoe.’ huka avane hunategane.” huno hie.

31 Higeno Pita'la tokiya'age ke huno hie “Kagai'ene nahaesage'na faligahuanagi'na kagai kagihena avanena hu'na fala okigahue.” huno hige'ya muki'la anaga'mo'ya nagoke kege'ya humainae.

Yisasi'la Ketesemani hoyafi nunamu mo humaine.

32 Hute'ya Ketesemani uva'yi hageno Yisasi'la agai'aenema tokae'ya nemaiya anagafena mage huno hie “Tamakaya male maineho. Nagaya Anumaya Kotitega nunamu hu'na havigegahue.” huno hie.

33 Pita'ene Yemesi'ene Yoni'ene amavaleno viana aepa heno aipamo'la kana'age higeno huumana halegeno kasageke hie.

34 Huteno mage huno hamapaiye “Nahau nayamopamo'la tusi'la kana'age nehige'na ago falisua kava nehugi male mainetama kava yagaitama maineho.” huno hie.

35 Osi'la via'amo nunamu huno havigegahe mopafi ago'ya moyeno maineno nunamuna mage huno havige “Kahaisigekahena falisua kana'nia alitalesane hu'na kahavinegoe.

36 Nenafagae kagaya muki'la yana kanale hate'asine. Nagaya falisua kava nehugi ani havi kanamo'la satu'age hia ti kana tima hanea ke'ayola nahafaletalo. Afa'la nagai nagu nagesa akave ohuka kahaisia yana afa'la huo.” huno havige.

37 Havigeteno via'amo momakeana agai'aenema tokae'ya nemaiya anagala fae'ya mainageno Pitafena mage huno hie “Saimonigae

faekage mainano? Vae kagaya aupa kana kano¹a kava o¹yagaikage mainano?

³⁸ Satani¹a ayelamavataga hisigeno tamaku¹amo¹a ‘Ohugahue.’ huno tokiya¹age humaineanagi afa¹a amega tamaugafamo¹a tokiya¹a omaleneanagino ‘Hugahue.’ huno hisia yana hugahigi Satani kema ohavisaya yafena kava yagaitama mainetama Anumayamotega ke hutama havigeho.” huno hamapaiye.

³⁹ Huteno amataleno via¹amo Anumayamotega havigea kea ani¹a huno nago¹ene mo havige.

⁴⁰ Havigeteno eteno momakeana amau toko-toko hige¹ya fae¹ya mainageno momakeanagi “Vae tagaya na¹ane hisune?” huge¹ya amake-sagu¹mo humainae.

⁴¹ Hageno Yisasi¹a eteno ea¹amo tagufa (3) kanale amakaifena mage huno hamavige “Maifalu hutamage faetama mainao? Hailagino kana¹nia ago falote nehie. Nagaya ikapinagati emainoa kanoa vaya¹mo natenea nafa¹nemonia nagesi huno navaleno kefo yama nehaya vaya¹mogami amayapi natesige¹ya nahaegahe nehae.

⁴² Muki¹amogatama hetitama vigetao. Ageho nagesi huno nahaesia kanoa ago ne¹legi vigeta mogamano.” huno humaine.

Yutasi¹a Yisasina avaleno kame vaya amayapi atene.

⁴³ Yisasi¹a mani kea nehigeno aupa¹a Yutasi¹a tuelufu¹a (12) anaga¹enema tokaeno nemiya kanomo¹a eva¹yi hige¹ya agai¹ene muki¹a

vaya'yagaene mono note kava vaya'ene ka-hegi kema havilinaya anaga'ene nago'a Yuta vayatamaenema humataya vaya'mo'ya aya'aya naepege naipege hu'ya muki ka'yo'ene ali'ya emainae.

⁴⁴ Agesi huno Yisasina haesaya yama amavalisea kanomo'a vaya'yagahena mage huno hamapaiye “Atako'ma hisua kanoa haesaya kano mainegi atafa hutama tokiya'age hutama avaletama viho.” huno hamapaiye.

⁴⁵ Yutasi'a eva'yi huno Yisasite ea'amo mage hie “Hulavenelina kanomogae.” nehuno atako me hie.

⁴⁶ Atako hige'ya agete'ya vaya'yagamo'ya Yisasina atafa hu'ya ayetalako humainae.

⁴⁷ Atafa nehageno nagola agai'aenema hetimaiya kanomo'a aya'aya naepe'a hevayu huno ala mono note hagote kava kanomo ali'ya kano'amo agha aifakalitalegeno asaka hulavimaine.

⁴⁸ Aifakalitegeno Yisasi'a mage huno hie “Tamakaya nagai'fena ‘Vaya nehamaeno musufaya nehia kano maine.’ hutama nagai'ma natafa hugahena aya'aya naepene muki ka'yo'ene alitama ne'ao?”

⁴⁹ Muki'a kanafina efi'efi hu'na tamakai'ene maine'na ala mono nopina mono kea huhale'na nehuanagi nagaila natafa ohunayanagi afa'ala kanalele. Nayoma kaemalenaya kemo'a falote huno tamage hisia yafe menia natafa nehae.” huno hie.

⁵⁰ Hige'ya muki'a agai'aenema tokae'ya ne-

maiya anagala ne'atale'ya fale ha'no humainae.

Nago neya kanomo'a koli huno falemaine.

⁵¹⁻⁵² Nago neyamo'a aye ohati kena kenalafama'age failino Yisasi akave umainege'ya agaila atafa hugahe hageno kena'a hateno ne'ataleno augafa alapa'age aiyayeno faleno umaine.

Yisasina kanisole vaya amaulagale kaiyekea hutena.

⁵³ Yisasina avale'ya ala mono notela hagote kava kanomote age'ya mono note kava vaya'yagaene Yuta vayatamayagaene kahegi kema havilinaya anaga'ene alitalu hu'ya mainae.

⁵⁴ Pita'a akave anatino vianagi avatela o'unegi alu'ale umaineno ala mono notela hagote kava kanomo nomo haupale uva'yi huno ati vaya'ene mopale umaineno atale tota huno maine.

⁵⁵ Mono note kava vaya'mo'yaene muki'a kanisole vaya'ene Yisasi'ma haesaya kaiyekema hutegahena nago'a vaya'mo'ya “Kefo kavala higeta agemainone.” hu'ya hutesaya vayafe atiyayana omainae.

⁵⁶ Omaige'ya kasago'ya vaya'mo'ya havige hu'ya Yisasifena hayanagi amakai kemo'a nago katela ohunagi alu ke alu ke mai'ya humainae.

⁵⁷⁻⁵⁸ Nago'a vaya'mo'ya heti'ya havige hu'ya Yisasifena mage hu'ya hae “Tagaya agai'ama humainea kea havilinone mage huno humaine 'Nagaya vaya'mo'yama kimalenaya ala mono nona ali'na lagape aitale'na tagufa (3) kanafi ani nona ete'na vaya'mo'ya nokiya avamete no

ali hetigahue.' huno higeta havilinone." hu'ya nehæe.

⁵⁹ Hayanagi ani kemo'a nago avamete kea ohunagi alu ke alu ke mai'ya humainæe.

⁶⁰ Hageno ala mono notela hagote kava kanomo'a amu'no'amifi hetimaineno Yisasina mage huno havige "Na augafa ke kagaifena nehæe? Kagaifena kaiyekema hunegatayana kenona'amia hufalote huka nohane?" huno havige.

⁶¹ Havigeanagi Yisasi'a kea ohuno avaya lukino maineno nagola osi ke kano'a ohutafa huno mainegeneno ala mono notela hagote kava kanomo'a eteno nago'ene havige "Kagaya Anumaya Koti'a taugafa aligatigahema hugatenea kano mainano? Kagaya agima alisaga nehaya Anumaya Kotina nafa'ne'amoga mainano?" huno havige.

⁶² Havigeveno Yisasi'a hufalote huno hie "E, nagaya ani kano mainoanagitama tamakaya hæenaga'a Ikapinagati emainoa kanoa vaya'mo nateænea nafa'nemonia tusi'a tokiya yama'a hæanea Anumaya Kotina tamaga ayatega hæanea siale maine'na ikate hæanea siate esugetama nagegahæe." huno hie.

⁶³ Higeno ala mono notela hagote kava kanomo'a ani kea havigeno aipamo'a tokiya'age higeno kena'a alino hatata nehuno mage huno hie "Tagaya hai havunanagi'ya nago'a vaya'mo'ya kaiyekea huo'atesæe.

⁶⁴ Anumaya Kotifema huhaviya hutea kea ago nehavigi. Na tamakesa nehaviye?" huno hige'ya mage hu'ya hæe "Tamage nehane anona yama'a

alisia yafe haesageno falisie.” hu'ya hae.

⁶⁵ Hute'ya nago'a vaya'mo'ya Yisasina amavetu'na hene'ate'ya aulagafi aiso hutene'ya aikoneli'ya mage hu'ya havigae “Kaune kema nehana kanomoga tahapaiyo ta'ya negahayae?” hu'ya havinege'ya ati vaya'mo'ya amayateti aikolimainae.

Pita'a Yisasifena avane huno “Nagaya no'agoa kano maine.” huno hie.

⁶⁶⁻⁶⁷ Pita'a nomo haupalega afetega mainegeno ala mono notela hagote kava kanomona ali'ya muna'mo'a anile emaineno ageana Pita'a ata lota nehigeno ani muna'mo'a megeteno Pitana agesagali maineno mage huno hie “Kagayae-nena Nasaleti Yisasi'ene vaiyatete nehana kano.” huno hie.

⁶⁸ Higeno Pita'a avane huno “A'ao nagaya ani kanoa o'agenoa kanohe maika nehane.” huno nehuno fiate ne'vigeno anile kokolemo'a agea aimaine.

⁶⁹ Fiate mainegeno ani muna'mo'a mogeteno anile hetimaiya vayafena mage huno hie “Mani kanoa Yisasi anagapiti kano.” huno hie.

⁷⁰ Higeno Pita'a nago'ene eteno “A'ao nagaya ani kanoa omainoe.” huno hie. Osi kana kano'a maige'ya anile hetimaiya vaya'mo'ya mage hu'ya hae “Tamage kagaya Kalili kano mainana yafe agai'ene vaiyatete nehana kano mainane.” hu'ya hae.

⁷¹ Hageno Pita'a mage huno hie “Nagaya tam-agemo ohisugenola Anumaya Koti'a nahaesie.

Anumaya Koti aulagafina tamage hu'na tamahanepauve tamakayama haya kanoa nagaya o'agenoa kanoe.” huno hie.

⁷² Nehigeno aupa'la hagoteno agema aiya kokolemo'la anile via'amo agea aigeno Pitana agesamo'la aikalo higeno Yisasi'ma hapaigeno havimainea kea mage huno humaineane “Kokolemo'la tole kanale agea o'ainesigeka kagaya tagufa (3) kanale avane huka nagaifena 'No'agoa kano maine.’ huka hugane huno humainea kemo'la Pita agesamo'la aikalo higeno haviteno tusi'la avitemaine.

15

Yisasina avale'ya Pailatite umainae.

¹ Kola alino halege'ya muki'la mono note kava vaya'ene Yuta vayatamaene kahegi kema havilina naya anaga'ene kanisole vaya'ene Yisasina haesageno falisia kea huge havige hute'ya Yisasina nofi kitete'ya ala kamani kava kanole, Pailatite* avale'ya ayapi motenae.

² Motageno Pailati'la Yisasifena mage huno hie “Kagaya Yuta vea'mogami Sauve kano mainano?” huno havigegenno Yisasi'la mage hie “Kagaika'la ani kea hai nehane.” huno hie.

³ Hige'ya mono note kava vaya'mo'ya kasago'ya kea “Ma'la kefo kava humainane.” hu'ya hutena.

⁴ Hune'atageno Pailati'la nago'ene mage huno hie “Havio muki'la kefo yama nehana yana ali

falote nehagi kagaya kenona'amia na'a higeke nohane?" huno hie.

⁵ Hianagi Yisasi'a kenona'a nagola osi ke kano'a ohigeno Pailatina ama'yo aimaine.

Pailati'a Yisasife "Yafaga yosale nili hetama asaigeno falino." huno hie.

⁶ Kafu'ahe kafu'ahe Anumaya Koti'a amau-gafama aligatimainea kanahe amakesa havi'ya imua negiyanagino Pailati'a muki'a ani imu kisaya kanafina nagoke nofi hutegenonemaiya kanoa vaya'yagamo'ya haesaga hu'ya "Agaya esie." hu'ya haya kanohe nofipitila "Hai ha'no hanagi vu." huno hune'atea kanae.

⁷ Ani kanafina nago kanomo agia Palapasi'e kamani vaya'ene tuma nehaya vaya'ene maineno tuma haya kanafina vayala tavata nehamaeyaya vaya'ene mainege'ya kina nopi avale'ya hutenayane.

⁸ Hutnayanagi'ya vaya'yagamo'ya Pailatife mage hu'ya me hae "Muki'a imuma kina kanafima nehana kavala hulato." hu'ya hae.

⁹ Hageno Pailati'a mage huno hamavige "Nagaya Yisasifena Yuta veate Sauve kanomofe 'Hai ha'no hanagi vu.' hu'na hisugetama musena hugahao?" huno hamavige.

¹⁰ Hige'ya mono note kava vaya'mo'ya ma amakesa haviye "Muki'a veala Yisasi kege'ya nehavi'ya tagai kea nohaviye." hute'ya ani yafe Yisasifena amaipamo'a haviya hutete'ya Pailatite avale'ya ageno Pailati'a ani yafe agesa nehavino humaine.

11 Havianagi mono note kava vaya'mo'ya muki'a vaya'mogami amaipa moye'ya mage hu'ya hamapaiye “Mage hutama hiho ‘Palapasina atalesanageno afa'a esie.’ hutama hiho.” hu'ya hae.

12 Hageno Pailati'a vaya'yagahena mage huno hamavige “Ani'a hisuana ma kanomofe tamakaya Yuta vayate Sauve kano maine hutama nehaya kanomofena na'a hutesue?” huno hamavige.

13 Hamavigege'ya muki'a vaya'mo'ya ala kefiti mage hu'ya hae “Yafaga yosale nili hetama asaigeno falino.” hu'ya hae.

14 Hageno Pailati'a mage huno hamavige “Na'a higetama na kea nehae? Hana'a augafa kefo kava humaine?” huno hianagi amakaya ete'ya ali'ya alapi atale'ya ala kefiti mage hu'ya hae “Yafaga yosale nili hetama asaigeno falino.” hu'ya hae.

15 Hageno Pailati'a muki'a vaya'mo'ya muse hisaya kava hugahue huno Palapasina nofipiti avaleno ne'ataleno Yisasina agata aisifa ka'yoteti haifu amitenno Yisasina ati vaya amayapi ateteno “Yafaga yosale nili hetama asaigeno falino.” huno hie.

Ati vaya'mo'ya Yisasina hu'ya akaya atenae.

16 Ati vaya'mo'ya Yisasina avale'ya ala kava kanomo no haupalega umaine'ya muki'a amakai'ene nemaiya ati vayafe ke hage'ya emainae.

17 Emaine'ya Yisasina akaya ategahe “Ala kano mainane.” hu'ya hisaya yafe aya'aya haesa

kena ali'ya faitete'ya aveta'nafa'age nofi ali'ya mo aigalaki me aigalaki hu'ya tumano kula talo hu'ya Yisasina anute vaitenae.

¹⁸ Vaitete'ya aepa he'ya huhaviya hutegahena mage hu'ya hae “Felugae. Yuta vaya'mogami sauve kanomogae.” hu'ya akaya atae.

¹⁹ Ne'ate'ya anute ka'lyoteti nago'ene nago'ene hu'ya aikoneli'ya augafale amavetu'na hene'ate'ya amale'ya aye'ya mopale maine'ya “Ala kano mainane” hu'ya ayevataga vatago humainae.

²⁰ Kigi hune'ate'ya haesa kena hatene'atalete'ya agai'a kena faitete'ya yafaga yosale nili hegahe avale'ya umainae.

Yisasina yafaga yosale nili he'ya asaimainae.

²¹ Kategama vayana Saimoni'ene fotu humainae. Ani kanoa Sailini kumate kanoe. Alekasata'ene Lufasiganiene ne'anafa'e. Ani Saimoni'a hoyafinagati kate ene'vige'ya ati vaya'mo'ya tokiya'age ke hu'ya “Kaiyayeka yafaga yosa melika vuo.” hu'ya hageno molino umaine.

²² Alino vige'ya Yisasina avale'ya vaya'amo'ya Kologota kumate uva'yi hae. Ani kuma'mo agimo'a tagaiti kefina anu ayamufa kumale hu'ya nehae.

²³ Ani ati vaya'mo'ya “Haesunageno falisiana agata ai yafenagita agatama o'aisia tina amisunageno nesie.” hu'yama hayana anima agata o'aisia timo agia mea. Mea'ene nofi

alagamo ti'ene nagopi ali havigu hute'ya ali'ya amiyana Yisasi'a ani tifena “A'ao.” huno onene.

²⁴ Onege'ya yafaga yosale nili he'ya asaimalete'ya kena'a fako hu'ya aligahe musufa yama nehaya yokalo lage'ya amakasaya vaya'mo'ya alimainae.

²⁵ Natena naeni (9) kiloki yagemo'a anale hai va'yi hige'ya Yisasina yafaga yosalela nilia male'ya hete'ya asaimainae.

²⁶ Asaite'ya “Ma kava higeta haune.” hu'ya kaemalenae “Mani kanoa Yuta veate ala Sauve kano.” hu'ya kae'ya malenae.

²⁷⁻²⁸ Kaemate'ya Yisasi'ene tole kanolatana vaya nehamae'ana musufa yama neha'a kanolatana nago kanoa Yisasina tamaga kaiyaga'a hae'ya asaimale'ya nago kanoa haoga kaiyaga'a hae'ya asaimale'ya humainae.

²⁹ Humalenge'ya kate'ma ute ete hu'ya agasaya vaya'mo'ya amake'ya ka'yo ai'ya “Kefo kano maine.” hu'ya kigi yokalofiti huhaviya hune'ate'ya mage hu'ya hae “Oho kagaya ‘Ala mono nona ali'na lagape aitaletena tagufa (3) kanafi ete'na kitalegahue.’ huka nehana kano mainane?”

³⁰ Menia kagaya yafaga yosa ne'ataleka kagaika'a elavika kaugafa aligatio.” hu'ya hae.

³¹ Hage'ya mono note kava vaya'ene kahegi kema havilinaya anaga'ene amakai'ami vaya'mo'yaene ani'a hu'ya kamuge hatage'ya vaine'ate'ya mohu mehu hu'ya huhaviya hune'ate'ya mage hu'ya hae “Nago'a vea

amaugafa aligatimainegi na'a higeno agai'a augafa ali nokatie.

³² Kalaisiga Isaleli vayate Sauve kano'amimoga yafaga yosa ne'ataleka elavigeta agamano. Agesunana kagaifena havita tagupi maleta tametitia hugahune." hu'ya huhaviya hune'atageno agai'enema yafaga yosale'ma asaimalaya musufa kanolatamoganienenena ani'a hu'ana Yisasina huhaviya hutena'e.

Yisasi'a ago falie.

³³ Yagemo'a euno amu'noka'no higeno halemainea yamo'a ha'no higeno muki'a kotega tusi'a hanikino via'amo une kanalega eteno ali halemaine.

³⁴ Une kanalega Yisasi'a ala kefiti ke huno agai'a kefiti mage huno hie "Eli Eli lema sapakatani." huno hie. Tagaiti kefina mage huno hie "Anumaya Koti'nimogae, Anumaya Koti'nimogae na'a higeka nagaila nenatalane?" huno hie.

³⁵ Hige'ya nago'a anile hetimaiya vea'mo'ya havite'ya mage hu'ya hae "Ilaiyafe ke nehigi haviho." hu'ya hae.

³⁶ Hageno nago kanomo'a via'amo hava ko'yafa kana yana alino atu'age nofi alagamo tipi ayeteno alino via'amo kupaga ka'yote maleno ani hava ko'yafa kana yana kiteno "Yisasi'a mayu mayu huno nesie." huno ne'amino mage huno hie "Agava maineta agesune Ilaiya'a yafaga yosaletila mevaleno elavisifi agegahune." huno hie.

37 Higeno Yisasi¹a ala kegefa huteno falimaine.

38 Faligeno¹a ala mono nopima ala kena aya¹aya kenagefama asaimalenaya kenamo¹a Yisasi¹ma falia kana kano¹ale analeti aepa heno amu¹nopiti hatata hulole hulavino mo talene.

39 Ati vayate kava kanomo¹a Yisasina aulega hetimaineno Yisasi¹a kema huteno falia yana ageteno mage huno hie “Tamage huno mani kanoa Anumaya Koti nafa¹nelafa maine.” huno hie.

40 Nago¹a a¹neyaga alu¹ale maine¹ya age-mainae. Nago¹amogami amakia, osi Yemesi¹ene Yosefegani ita¹animo¹a Malia¹e Salomi¹agi Magatala kumate Malia¹agi hu¹ya mainae.

41 Yisasi¹a Kalilima mainea kanafina ani a¹neyagamo¹ya akave vaiyatete nehuya kavela kae¹ya ne¹amiyane. Muki¹a a¹neyaga Yisasi¹ene Yelusalemu tokae¹ya umainaya a¹neyaga alu¹ale heti¹ya maine¹ya Yisasina agemainae.

Yisasina yafa kapi hevaitenae.

42-43 Sapati yupahe havi¹ya talo tala hisaya kanagino yagemo¹a lavi falegahe higeno Yosefe¹a Alimatia kumate kanoa Yuta kanisolefi nemaiya kanoa eva¹yi hie. Ani kanoa Anumaya Koti¹ma kava yagaisia kanahe muse huno agava nehia kanogino kolia ohuno Pailatite via¹amo mage huno havige “Yisasina augafa¹a aligahe nehue.” huno mo havige.

44 Havigegeno Pailati¹a “Aupa¹a ago falimai-negeka nehano? Avo¹nio nama¹yo aiye.” huno

agesa nehavino nago¹a ati vayate kava ya-gaimainea kanohe ke higeno egeno “Yisasi¹a ago falimaineo?” huno havige.

⁴⁵ Havigegenō ati vayate kava kanomo¹a “E, ago falimaine.” huno higeno Pailati¹a Yosefena mage huno hapaiye “Kanalelagi augafa afa¹a moligane.” huno hie.

⁴⁶ Higeno Yosefe¹a via¹amo ka¹yo muki aya¹aya kena molino via¹amo augafa yafaga yosaleti alino maleneno kenaleti augafalela aigalaki kalaki huno ha¹ya kitenō alino via¹amo hefalege¹ya kafi-malenaya yafakapi Yisasina hevaiteteno avayale¹ma aililesia yafana ayetufeno anile mo aililemalene.

⁴⁷ Magatala Malia¹ene Yosefena ita¹amo¹a Malia¹ene maine¹ana hevaitea yafa kaana agemaina¹e.

16

Yisasi¹a ago falimainefitila hetimaine.

¹ Sapati yupamo¹a ha¹no hige¹ya Yemesina ita¹amo¹a Malia¹e hamo¹amo¹a Magatala kumate alagi Salomi¹ene Yisasina augafale mana¹age masaveteti faletegahe ani masavena ali¹ya emainae.

² Sota yupa yagemo¹a yaufa nehaige¹ya ani a¹neyaga komulega vae.

³ Kategama vayana amakai¹amige kea hume hume umainae “Komumo avayale¹ma aililemalea yafana ta taya huno avayaletila alino avayu huno faitega atalelategahie?” hu¹ya hae.

4 Nehu'ya agesaga hu'ya agayana ani ala yafakefa ago alikelitalageno faitega hanege'ya agemainae.

5 Agete'ya ani yafakapinaga hai fale'ya mogayana nago neyana aya tamaga kaiyaga mopale mainege'ya agayana ani kanomo'a aya'aya efe kena failinege'ya agete'ya tusi'a amama'yo aimainae.

6 Amama'yo ne'aigeno ani kanomo'a mage huno hie “Tamakaila tamama'yoa o'aino. Tamakaya Nasaleti Yisasife ati ne'ayae. Yafaga yosale nilima he'ya asaimalaya kanohe ati ne'ayayanagi agaya falimainefiti ago hetimaine. Mafina omainegi ani kanoma malaya kumala ma hanegi ageho.

7 Tamakaya utama Yisasi'enema tokae'ya ne-maiya anaga'ene Pita'ene mage hutama hama-paiho “Yisasi'a ofalino afa'a maineno'ma tamahapaimainea kemo'a ago uhagotelamateno Kalili umainegi anilega ne'utama Yisasina mogeho.” huno hamanepaiye.

8 Hige'ya amakaya atili hute'ya amama'yo aige'ya yafakapitila hatilavi'ya amaiyaye'ya vayanagi kolima haya yafe nago'a vayala ani kea hamaopainae.

Magatala kumate Malia'a Yisasina agemaine.

9 Sota yupa nate alakefafi Yisasi'a falimainefitila hetino via'amo hagoteno Magatala kumate Malia mainelega uva'yi higeno agemaine. Nayona ani a'lmo agupina seveni'a (7) Satani Avamula mainegeni Yisasi'a anatitaleneane.

10-11 Ani Malia'a ageteno via'amo Yisasi'enema tokae'ya nemaiya anagala mogeana tusi'a hamau hu'ya avine'atageno ani a'mo'a mage huno mo hamapaiye “Yisasi'a falimainefitila ago hetige'na nagaya agaila ago agete'na ne'oe.” huno hamapaige'ya havite'ya “Havige nehane.” hu'ya amametitia ohunae.

Agai'a anagapiti tole kanolatamogania katega Yisasina agemaina'e.

12 Haenaga'a ani vayapitila tolemogania kumala atale'ana katega ne'va'ageno Yisasi'a eva'yi hige'ana agemaina'e.

13 Agete'ana ani kanolatana ete'ana vaya'animo'ya mainalega va'a'amogani “Yisasi'a na'a kano ago'e.” hu'ana mo neha'ana ani vaya'mo'ya “Havige neha'e.” hu'ya havi'ya amametitia ohunae.

Yisasi'a aleveni'a (11) anaga'amo'ya ali'ya al- isaya ke hamapaimaine.

14 Haenaga'a aleveni'a (11) anagala kave mai'ya nenageno Yisasi'a eva'yi huno maineno amakaya vaya'mo'yama haya kemo'a “Yisasi'a falimainefitila ago hetigeta agemainone.” hu'ya haya kema havisaya yafena amaku'amo'a ti- lege'ya havi'ya amametitima ohaya yafe Yisasi'a ke memamakie.

15 Kemamakiteno mage huno hamapaiye “Muki'a kotega utama nagai kanale mono kea alitama vea'mogamina mo hamapaiho.

16 Hamapaisage¹ya nago¹a vea¹mo¹ya ani kehena ‘Tamage nehae.’ hu¹ya havi¹ya amakupi male¹ya amametiti hisagetama tina falemate-sageno Anumaya Koti¹a amaku amamena aligati-gahianagi nago¹a vea¹mo¹ya ani kehena ‘Havige nehae.’ hu¹ya havi¹ya amakupi omalesaya veafena Anumaya Koti¹a ‘Hani yapi tegelege nehia atafi viho.’ huno humategahie.

17 Nagai kema havi¹ya amakupi male¹ya ametiti hisaya vea¹mo¹ya ani tokiya¹age avame yana hugahae nagai nagile Kefo Avamula vea amakupitila amanati ne¹atale¹ya amaku amakesafiti ohavinesaya kefitila alu amake alu amakea aigahae.

18 Vea¹ma akafu ne¹amanisia osifa¹vema atafa hisayana amaugafa amagata o¹aisige¹ya ofaligahae. Vaya¹ma nefalia posini lima nesayana amaugafa amagata o¹aisige¹ya ofaligahae. Kalima ne¹aliya vaya¹mogami amaugafale¹ma amayama malesageno¹a kali¹amimo¹a kanale humategahie.” huno hie.

Anumaya Koti¹a Yisasina avalegeno ikapinaga haimaine.

19 Yisasi¹a, Anumayatimo¹e mani kea hama-paitegeno ikapinaga avalesaga higeno haino Anumaya Kotina tamaga ayatega umaine.

20 Umainege¹ya Yisasi¹ene tokae¹ya nemaiya anagala muki¹a kotega ute ete hu¹ya Yisasi mono kea hamanepaigeno Anumayamo¹a amakai¹ene vaiyeno amaya huno tokiya yama¹aleti “Ani kea tamage nehae.” hu¹ya vea¹mo¹ya havisaya yafe

kasago¹ya tokiya avame yana humainae. Mani
kema hua kea tamage.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 18 Apr 2025 from source files dated 31 Aug 2023

55807fd5-1005-5405-89da-5533a7950c65